

萬善同歸集卷第一

史一

杭州慧旨永明寺智覺禪師 延壽 述

夫衆善所歸皆宗實相如空包納似地發生
是以但契一如自含衆德然不動真際萬行
常興不壞緣生法界恒現寂不閔用俗不違

史一

真無齊觀一際平等是以萬法惟心應須
廣行諸度不可守愚空坐以滯真修若欲萬
行齊興畢竟須依理事理事無閔其道在中
遂得自他兼利而圓同體之悲終始該羅以
成無盡之行若論理事幽旨難明細而推之

非一非異是以性實之理相虛之事力用交
徹舒卷同時體全徧而不差跡能所而似別
事因理立不隱理而成事理因事彰不壞事
而顯理相資則各立相攝則俱空隱顯則互
興無閔則齊現相非相奪則非有非空相即

相成則非常非斷若離事而推理墮聲聞之
愚若離理而行事同凡夫之執當知離理無
事全水是波離事無理全波是水理即非事
動濕不同事即非理能所各異非理非事真
俗俱亡而理而事二諦恒立雙照即假宛爾

幻存雙遮即空泯然夢寐非空非假中道常
明不動因緣寧虧理體故菩薩以無所得而
為方便涉有而不乖空依實際而起化門履
真而不閼俗常然智炬不昧心光雲布慈門
波騰行海遂得同塵無閼自在隨緣一切施

為無非佛事故般若經云一心具足萬行華
嚴經云解脫長者告善財言我若欲見安樂
世界阿彌陀佛隨意即見乃至所見十方諸
佛皆由自心善男子當知菩薩脩諸佛法淨
諸佛刹積習妙行調伏衆生發大誓願如是

一切悉由自心是故善男子應以善法扶助
自心應以法水潤澤自心應於境界淨治自
心應以精進堅固自心應以智慧明利自心
應以佛自在開發自心應以佛平等廣大自
心應以佛十力照察自心古德釋云心該萬

史一

二

法謂非但一念觀佛由於自心菩薩萬行佛
果體用亦不離心亦去妄執之失謂有計云
萬法皆心任之是佛驅馳萬行豈不虛勞今
明心雖即佛久翳塵勞故以萬行增修令其
瑩徹但說萬行由心不說不修為是又萬法

即心修何闕心問曰祖師云善惡都莫思量自然得入心體涅槃經云諸行無常是生滅法如何勸修故遠祖教答祖意據宗教文破著若禪宗頓教泯相離緣空有俱亡體用雙寂若華嚴圓旨具德同時理行齊敷悲智交

濟是以文殊以理印行差別之義不虧普賢以行嚴理根本之門靡廢本末一際凡聖同源不壞俗而標真不離真而立俗具智眼而不沒生死運悲心而不滯涅槃以三界之有為菩提之用處煩惱之海通涅槃之津夫萬

善是菩薩入聖之資糧衆行乃諸佛助道之階漸若有目而無足豈到清涼之池得實而忘權矣昇自在之域是以方便般若常相輔翼真空妙有恒共成持法華會三歸一萬善悉向菩提大品一切無二衆行咸歸種智故

史一

三

華嚴經云第七遠行地當修十種方便慧殊勝道所謂雖善脩空無相無願三昧而慈悲不捨衆生雖得諸佛平等法而樂常供養佛雖入觀空智門而勤集福德雖遠離三界而莊嚴三界雖畢竟寂滅諸煩惱而能為一

切衆生起滅貪瞋癡煩惱雖知諸法如幻如夢如影如響如燄如化如水中月如鏡中像自性無二而随心作業無量差別雖知一切國土猶如虛空而能以清淨妙行莊嚴佛土雖知諸佛法身本性無身而以相好莊嚴

其身雖知諸佛音聲性空寂滅不可言說而能隨一切衆生出種種差別清淨音聲雖隨諸法了知三世惟是一念而隨衆生意解分別以種種相種種時種種劫數而脩諸行維摩經云菩薩雖行於空而植衆德本是菩薩

行雖行無相而度衆生是菩薩行雖行無作而現受身是菩薩行雖行無起而起一切善行是菩薩行古德問云萬行統惟無念今見善見惡願離願成疲役身心豈當為道答此離念而求無念尚未得真無念况念無念而

無闕乎又無念但是行之一豈知一念頓圓如上所引佛旨煥然何得空臨高心以少為足擬欲蛙嫌海量螢掩日光乎問泯絕無寄境智俱空是祖佛普歸聖賢要路若論有作心境宛然憑何教文廣陳萬善答諸佛如來

一代時教自古及今分宗甚衆撮其大約不出三宗一相宗二空宗三性宗若相宗多說是空宗多說非性宗惟論直指即同曹溪見性成佛也如今不論見性罔識正宗多執是非紛然諍競皆不了祖佛密意但徇言詮如

史一

四

教中或說是者即依性說相或言非者是破相顯性惟性宗一門顯了直指不說是非如今多重非心非佛非理非事泯絕之言以為玄妙不知但是遮詮治病之文執此方便認為標的却不信表詮直指之教頓遺實地昧

却真心如楚國愚人認雞作鳳猶春池小果執石為珠但任淺近之情不探深密之旨迷空方便豈識真歸問諸佛如來三乘教典惟有一昧解脫法門云何廣說世間生滅緣起擬心即失不順真如動念即乖違於法體答

若論一相一味此乃三乘權教約理而言即一切因緣而為過惡今所集者惟顯圓宗一一緣起皆是法界實德不成不破非斷非常乃至神變施為皆法如是故非假神力暫得如斯纔有一法緣生無非性起功德華嚴

經云此華藏世界海中無間若山若河乃至樹林塵毛等處一一無不皆是稱真如法界具無邊德問經云但凡夫之人貪著其事又云取相凡夫隨宜為說若得理本萬行俱圓何須事跡而興造作乎答此是破貪著執取

史一

五

之文非干因緣事相之法淨名經云但除其病而不除法金剛三昧經云有二入一理入二行入以理導行以行圓理又菩提者以行入無行以行者緣一切善法無行者不得一切善法豈可滯理虧行執行違理祖師馬鳴

大乘起信論云信成就發心有三一直心正念真如法故二深心樂集一切諸善行故三大悲心欲拔一切衆生苦故論問上說法界一相法體無二何故不惟念真如復假求學諸善法之行論答譬如大摩尼寶體性明淨而有鑛穢之垢若人雖念寶性不以方便種種磨治終無得淨如是衆生真如之法體性空淨而有無量煩惱垢染若人雖念真如不以方便種種熏脩亦無得淨以垢無量徧脩一切善行以為對治若人修行一切善法自

然歸順真如法故略說方便有四種一者行根本方便謂觀一切法自性無生離於妄見不住生死觀一切法因緣和合業果不失起於大悲修諸福德攝化衆生不住涅槃以隨順法性無住故二者能止方便謂慙愧悔過

能止一切惡法令不增長以隨順法性離諸過故三者發起善根增長方便謂勤脩供養禮拜三寶讚歎隨喜勸請諸佛以愛敬三寶淳厚心故信得增長乃能志求無上之道又因佛法僧力所護故能消業障善根不退以

隨順法性離凝障故四者大願平等方便所謂發願盡於未來化度一切衆生使無有餘皆令究竟無餘涅槃以隨順法性無斷絕故法惟廣大徧一切衆生平等無二不念彼此究竟寂滅故牛頭融大師問諸法畢竟空有

史一

六

菩薩行六度萬行否答此是三乘二見心若觀心本空即是實慧即是見真法身法身不住此空謂有運用覺知即是方便慧方便慧亦不可得即是實慧恒不相離前念後念皆由二慧發故云智度菩薩母方便以為父一

切衆導師無不由是生先德問云即心是佛何假脩行答祇為是故所以修行如鐵無金雖經鍛鍊不成金用賢首國師云今佛之三身十波羅蜜乃至菩薩利他等行並依首法融轉而行即衆生心中有真如體大今日修行引出法身由心中有真如相大今日修行引出報身由心中有真如用大今日修行引出化身由心中有真如法性自無慳貪今日修行順法性無慳引出檀波羅蜜等當知三祇修道不曾心外得一法行一行何以故但

是自心引出自淨行性而起修之故知摩泥沈泥不能兩寶古鏡積垢焉能鑒人雖心性圓明本來具足若不衆善顯發萬行磨治方便引出成其妙用則水翳客塵長淪識海成妄生死障淨菩提是以祖教分朗理事相即

史

七

不可偏據而溺見河問善雖勝惡念即乖真約道而言俱非解脫何須廣勸滯正修行既涉因緣實妨於道答世出世間以上善為本初即因善而趣入後即假善以助成實為越生死海之舟航趣涅槃城之道路作人天之

基陞為相佛之垣牆在塵出塵不可暫廢十善何過弘在於人若貪著則果生有漏之天不執則位入無為之道運小心墮一乘之位發大意昇菩薩之階乃至究竟圓修終成佛果以知非關上善能為滯閔之因全在行人自成得失之咎故華嚴經云十不善業道是地獄畜生餓鬼受生之因十善業道是人天乃至有頂處受生之因又此上品十善業道以智慧修習心狹劣故怖三界故闕大悲故從他聞聲而了解故成聲聞乘又此上品十

善業道修治清淨不從他教自覺悟故大悲方便不具足故悟解甚深因緣法故成獨覺乘又此上品十善業道修治清淨心廣無量故具足悲愍故方便所攝故發生大願故不捨眾生故希求諸佛大智故淨治菩薩諸地故淨脩一切諸度故成菩薩廣大行又此上十善業道一切種清淨故乃至證十力四無畏故一切佛法皆得成就是故我今等行十善應令一切具足清淨乃至菩薩如是積集善根成就善根增長善根思惟善根繫念

善根分則善根愛樂善根修集善根安住善根菩薩摩訶薩如是積集諸善根已以此善根所得依果修菩薩行於念念中見無量佛如其所應承事供養又云雖無所作而恒住善根又云雖知諸法無有所依而說依善法

史一

而得出離大智度論云佛言我過去亦曾作惡人小蟲因積善故乃得成佛又如十八不共中有欲無滅者佛知善法息故常欲集諸善法故欲無滅修集諸善法心無厭足故欲無滅如一長老比丘目暗自縫僧伽梨袷脫

語諸人言誰樂欲為福德者為我袷針爾時佛現其前語言我是樂欲福德無厭足人持汝針來是比丘裴疊見佛光明又識佛音聲白佛言佛無量功德海皆盡其邊底云何無厭足佛告比丘功德果報甚深無有如我知恩分者我雖復盡其邊底我本以欲心無厭足故得佛是故今猶不息雖更無功德可得我欲心亦不休諸天世人驚悟佛於功德尚無厭足何況餘人佛為比丘說法是時肉眼即明慧眼成就又云佛言若不成就衆生淨

佛國土不能得無上道何以故因緣不具足
則不能得阿耨多羅三藐三菩提因緣者所
謂一切善法從初發意行檀波羅蜜乃至十
八不共法於是行法中無憶想分別故問夫
如來法身湛然清淨一切衆生祇為客塵所

史

九

蔽不得現前如今但息攀緣定水澄清何須
衆善向外紛馳反背真脩但成勞慮蒼無心
察現此是了因福德莊嚴須從緣起二因雙
備佛體方成諸大乘經無不具載淨名經云
佛身者即法身也從無量功德智慧生從慈

悲喜捨生從布施持戒忍辱柔和勤行精進
禪定解脫三昧多聞智慧諸波羅蜜生乃至
從斷一切不善法集一切善法生如來身又
云具福德故不住無為具智慧故不盡有為
大慈悲故不住無為滿本願故不盡有為此
乃自背圓詮不遵佛語擬投涅槃之縛欲沈
解脫之坑栽蓮華於高原植甘種於空界欲
求菩提華果何出得成所以云入無為正位
者不生佛法耳乃至譬如不下巨海不能得
無價寶珠如是不入煩惱大海則不能得一

切智寶問入法以無得為門履道以無為先
導若興衆善起有得心一違正宗二虧實行
答以無得故無所不得以無為故無所不為
無為豈出為中無得非居得外得與無得既
非全別為與無為亦非分同非別非同誰言

一二而同而別不閔千差若迷同別兩門即
落斷常二執所以華嚴離世間品云知一切
法無相是相相是無相無分別是分別分別
是無分別非有是有是非有無作是作作
是無作非說是說說是非說不可思議知心

與菩提等知菩提與心等心及菩提與衆生
等亦不生心顛倒想顛倒見顛倒不可思議
於念念中入滅盡定盡一切漏而不證實際
亦不盡有漏善根雖一切法無漏而知漏盡
亦知漏滅雖知佛法即世間法世間法即佛

史二

十

法而不於佛法中分別世間法不於世間法
中分別無法一切諸法悉入法界無所入故
知一切法皆無二無變易不可思議問一切
衆生不得解脫者皆為認其假名逐妄輪迴
楞嚴經中唯令以湛旋其虛妄滅生伏還元

覺得元明覺無生滅性為因地心然後圓成
果地修證云何一向徇斯假名論其散善轉
增虛妄豈益初心答名字性空皆為實相但
從緣起不落有無法句經云佛告寶明菩薩
汝且觀是諸佛名字若是有說食與人應得

充飢若名字無者定光如來不授我記及於
汝名如無授者我不應得佛當知字句其已
久如以我如故備顯諸法名字性空不在有
無華嚴經云譬如諸法不分別自性不分別
音聲而自性不捨名字不滅菩薩亦復如是

不捨於行隨世所作而於此二無執著是以
不動實際建立行門不壞假名圓通自性問
何以不任運騰騰無心合道豈須萬行動作
関心答古德顯佛果有三一亡言絕行獨明
法身無作果二從行漸修位滿三祇果三從

史一

十一

初理智自在圓融果此是上上根人圓修圓
證雖一念頓具不妨萬行施為雖萬行施為
不離一念若亡情冥合各是一門遲速任機
法無前後問觸目菩提舉足皆道何須別立
事相道場役念勞形豈皆妙旨答道場有二

一理道場二事道場理道場者周徧刹塵事
道場者淨地嚴飾然因事顯理藉理成事事
虛攬理無不理之事理實應緣無閑事之理
故即事明理湏假莊嚴從俗入真唯憑建立
為歸敬之本作策發之門覩相嚴心自他兼
利止觀云圓教初心理觀雖諦法忍未成湏
於淨地嚴建道場晝夜六時修行五懺悔六
根罪入觀行即乘戒兼急理事無瑕諸佛威
加真明頓發直至初住一生可階上都儀云
夫歸命三寶者要指方立相住心取境不明

無相離念也佛懸知凡夫繫心尚乃不得況
離相耶如無術通人居空造舍也依寶像等
三觀必得不疑佛言我滅度後能觀像者與
我無異大智論云菩薩唯以三事無厭一供
養佛無厭二聞法無厭三供給僧無厭天台
智者問云世間有空行人執其癡空不與修
多羅合聞此觀心而作難言若觀心是法身
等應觸處平等何故經像生敬紙木生慢敬
慢異故則非平等非平等故法身義不成答
我以凡夫位中觀如是相耳為欲開顯此實

相恭敬經像令慧不縛使無量人崇善去惡
令方便不縛豈與汝同耶乃至廣興法會建
立壇儀手決加持嚴其勝事遂得道場現證
諸佛威加皆是大聖垂慈示其要軌或覩香
華之相戒德重清或見普賢之身罪源畢淨

史一

十二

因茲法事圓備佛道遐隆現斯感通歸憑有
據是以須遵往聖事印典章不可憑虛出於
胸臆毀德壞善翻墮邪輪撥有疑空枉投邪
腎問金剛般若經云若以色見我以音聲求
我是人行邪道不能見如來如何立相標形

而稱佛事各息憑泯事此是破相宗直論顯
理即是大乘始教未得有無齊行體用交徹
若約圓門無閼性相融通舉一微塵該羅法
界華嚴經云清淨慈門刹塵數共生如來一
妙相一一諸相莫不然是故見者無厭足法

華經云汝證一切智十方等佛法具三十二
相乃是真實滅大涅槃經云非色者即是聲
聞緣覺解脫色者即是諸佛如來解脫豈同
凡夫橫執頑闕之境以為實色二乘偏證灰
斷之質而作真形是以六根所對皆見如來

萬像齊觀圓明法界豈待消形滅影方成玄
趣乎問即心是佛何須外求若認他塵自法
即隱答諸佛法門亦不一向皆有自力他力
自相共相十玄門之該攝六相義之融通隨
緣似分約性常合從心現境境即是心攝所

史

十三

歸能他即是自古德云若執心境為二遮言
不二以心外無別塵故若執為一遮言不一
以非無緣故淨名經云諸佛威神之所建立
智者大師云夫一向無生觀人但信心益不
信外佛威加益經云非內非外而內而外而

內故諸佛解脫於心行中求而外故諸佛護
念云何不信外益耶夫因緣之道進修之門
皆眾緣所成無一獨立若自力充備即不假
緣若自力未堪須憑他勢譬如世間之人在
官難中若自無力得脫須假有力之人救援
又如牽拽重物自力不任須假眾他之力方
能移動但可內量實德終不以自妨人又若
執言內力即是自性若言外力即成他性若
云機感相投即是共性若云非因非緣即無
因性皆滯閼執未入圓成若了真心即無所

住問經云觀身實相觀佛亦然一念不生天真頓朗何得唱他佛號廣誦餘經高下輪迴前後生滅既妨禪定但徇音聲水動珠昏當冥合吞夫聲為衆義之府言皆解脫之門一切趣聲聲為法界經云一一諸法中皆含

一切法故知一言音中包羅無閼十界具足三諦理圓何得非此重彼離相求真不窮動淨之源遂致語默之失故經云一念初起無有初相是真護念未必息念消聲方冥實相是以莊嚴門內萬行無虧真如海中一毫不

捨且如課念尊號故有明文唱一聲而罪滅塵沙具十念而形穢淨土拯危拔難殄障消冤非但一期暫拔苦津託此因緣終投覺海故經云若人散亂心入於塔廟中一稱南無佛皆已成佛道又經云授持佛名者皆為一

史一

十四

切諸佛共所護念寶積經云高聲念佛魔軍退散文殊般若經云衆生愚鈍觀不能解但令念聲相續自得往生佛國智論云譬如有人初生墮地即能日行千里足一千年滿中七寶以用施佛不如有人於後惡世稱一佛

聲其福過彼大品經云若人散心念佛乃至
畢苦其福不盡增一阿含經云四事供養一
間浮提一切衆生功德無量若有衆生善心
相續稱佛名號如一犍牛乳頃所得功德過
上不可思議無能量者華嚴經云住自在心

念佛門知隨自心所有欲樂一切諸佛現其
像故飛錫和尚高聲念佛三昧寶王論云浴
大海者已用於百川念佛名者心成於三昧
亦猶清珠下於濁水濁水不得不清念佛投
於亂心亂心不得不佛既契之後心佛雙亡

雙亡定也雙照慧也定慧既均亦何心而不
佛何佛而不心心佛既然則萬境萬緣無非
三昧也誰復患之於起心動念高聲稱佛哉
故業報差別經云高聲念佛誦經有十種功
德一能排睡眠二天魔驚怖三聲徧十方四

由二

十五

三塗息苦五外聲不入六令心不散七勇猛
精進八諸佛歡喜九三昧現前十生於淨土
群疑論云問名字性空不能詮說諸法教人
專稱佛號何異說食充飢乎答若言名字無
用不能詮諸法體亦應喚火水來故知筌蹄

不空魚兔斯得故使梵王啓請轉正法輪大
聖應機弘宣妙旨人天凡聖咸稟正言五道
四生並遵遺訓聽聞讀誦利益弘深稱念佛
名往生淨土亦不得唯言名字虛假不有詮
說者乎論云問何因一念佛之力能斷一切

諸障答如一香旃檀眇四十由旬伊蘭林采
香又譬如有人用師子筋以為琴弦其聲一
奏一切餘弦悉皆斷壞若人菩提心中行念
佛三昧者一切煩惱一切諸障皆悉斷滅大
集經云或一日夜或七日夜不作餘業志心

念佛小念見小大念見大又般若經云文殊
問佛云何速得阿耨菩提佛答有一行三昧
欲入一行三昧者應須於空閑處捨諸亂意
不取相貌繫念一佛專稱名字隨佛方所端
身正向能於一佛念念相續即是念中能見

過去未來現在諸佛晝夜常說智慧辯才終
不斷絕是知佛力難思玄通罕測如石吸鐵
似水投河慈善根力見如是事志心歸者靈
感昭然問凡所有相皆是虛妄但有好境取
即成魔何得著相興心而希冥感耶答修行

力至聖境方明善緣所生法爾如是故將證
十地相皆現前是以智切冥加道高魔盛或
禪思入微而變異相或禮誦懇志暫觀嘉祥
但了惟心見無所見若取之則心外有境便
成魔事若捨之則撥善功能無門脩進摩訶

史

十六

論云若真若偽惟自妄心現量境界無有其
真實無所著故又若真若偽皆一真如皆一
法身無有別異不斷除故智論云不捨者諸
法中皆有助道力故不受者皆法實相畢竟
空無所得故

萬善同歸集卷第一

萬善同歸集卷第二

史二

台教云疑者言大乘平等何相可論今言不爾祇曰平等鏡淨故諸業像現今止觀研心心漸明淨照諸善惡如鏡被磨萬像自現是知不有而有無性緣生有而不成緣生無性

史二

常冥實際中道冷然欣感不生分別情斷虛懷寂慮何得失之所惑乎又若諷誦遺典受持大乘功得幽深果報玄邈如經佛親比較譬如一人辯若文殊教化四天下人皆至一生補處格量功德不如香華供養方等經典

得下等寶又阿難疑審七佛現身證明實有此事又如說脩行得上等寶受持讀誦得中等寶香華供養得下等寶法華經云供養四百萬億阿僧祇世界衆生乃至皆得阿羅漢道盡諸有漏於深禪定皆得自在具八解脫不如第五十人聞法華經一偈隨喜功德百千萬億分不及其一又經云若人讀誦經處其地皆為金剛但肉眼衆生不能見耳南山感通傳云七佛金塔中有銀印若誦大乘者以銀印印其口令無遺忘普賢觀經云若七

衆犯戒欲一揮指項除滅百千萬億阿僧祇劫生死之罪者乃至欲得文殊藥王諸大菩薩持香華住立空中侍奉者應當修習此法華經讀誦大乘念大乘事令此空慧與心相應大般若經云無諸惡獸嚴亢寂淨而為居

止所謂聞法晝夜六時勤加讚誦聲離高下心不緣外專心意持賢愚經云行者欲成佛道當樂經法讀誦演說正使白衣說法諸天鬼神悉來聽受況出家人出家之人乃至行路誦經說偈常有諸天隨而聽之是故應勤

誦經說法已上皆是金口誠諦之言非是妄心孟浪之說是以志心誦者證驗非虛常為十方如來釋迦文佛密垂護念讚言善哉授手摩頭共宿衣覆攝受付囑隨喜威加乃至神王護持天仙給侍金剛擁從釋梵散華成

史三

二

就福因等法界虛空之際量校量功勝恒沙七寶之施緣乃至凡質通靈肉身不壞舌變紅蓮之色口騰紫檀之香聞一句而再趣菩提誦半偈而功齊大覺書寫經卷報受欲天供養持人福過諸佛可謂法威德力不思議

門萬端千靈因茲而感三賢十聖從此而生
亘古該今從凡至聖三業供養十種受持盡
稟真詮傳持不絕今何起謗而斷轉法輪乎
問經中祇讚如說修行深解義趣勤求無念
默契玄根云何勸修廣興唱誦答若約上上

圓根大機淳熟無諸遮障頓了頓脩若妄念
不生何須助道大凡微細想念佛地方無故
安般守意經序云彈指之間心九百六十轉
一日一夕十三億意意有一身心不自知猶
彼種夫也是知情塵障厚卒淨良難若非萬

善助開自力恐成稽滯又若論福業徧行門
中萬行莊嚴不捨一法皆能助道顯大菩提
具足十種受持亦無所闕故法華經云爾時
千世界微塵數菩薩摩訶薩從地涌出者皆
於佛前一心合掌瞻仰尊顏而白佛言世尊

史二

三

我等於佛滅度後世尊分身所在國土滅度
之處當廣說此經所以者何我等亦自欲得
是真淨大法受持讀誦解說書寫而供養之
以知登地菩薩非獨為他解說尚自發願誦
持何況初心而不稟受但先求信解悟入後

即如說而行口演心思助開正慧若未窮宗旨且徇文言雖不親明亦熏善本般若威力初後冥資於正法中發一微心皆是初因終不孤棄問欲真持經應念實相既忘能所誦者何人若云心口所為求之了不可得究竟推檢理出何門答雖觀能念所誦皆空空非斷空不闕能誦所持為有有非實有不空不有中理皎然執無則墮其邪空沒有則成其偏假是以一心三觀三觀一心即一而三相不同即三而一體無異非合非散不縱不橫

存泯莫羈是非焉局常冥三諦摠合一乘萬行度門咸歸實相又所難念誦有妨禪定者且禪定一法乃四辯六通之本是單凡蹈聖之因攝念少時故稱上善然須明沉掉消息之時經云如坐禪昏昧須起行道念佛或志誠洗懺以除重障策發身心不可確執一門以為究竟故慈愍三藏云聖教所說正禪定者制心一處念念相續離於昏掉平等持心若睡眠覆障即須策勤念佛誦經禮拜行道講經說法教化衆生萬行無廢所修行業回

向往生西方淨土若能如是修習禪定者是
佛禪定與聖教合是衆生眼目諸佛印可一
切佛法等無差別皆乘一如成最正覺皆云
念佛是菩提因何得妄生邪見故台教行四
種三昧小乘具五觀對治亦有常行半行種

次三

四

種三昧終不一向而局坐禪金剛三昧經云
不動不禪離生禪想法句經云若學諸三昧
是動非是禪心隨境界生云何名為定起信
論云若人唯修於止則心沉沒或起懈怠不
樂衆善遠離大悲乃至於一切時一切處所

有衆善隨已堪能不捨修學心無懈怠惟除
坐時專念於止若除一切悉當觀察應作不
應作若行若住若卧若起皆應止觀俱行是
以若能通達定散俱得入道若生滯闕行坐
皆即成非南岳法華懺云修習諸禪定得諸

佛三昧六根性清淨菩薩學法華具足二種
行一者有相行二者無相行無相安樂行甚
深妙禪定觀察六情根有相安樂行此依勸
發品散心誦法華不入禪三昧坐立行一心
念法華文字行若成就者即見普賢身是以

智者修法華懺誦至藥王焚身品云是真精進是名真法供養如來頓悟靈山如同即席乃至密持神呪靈貺昭然護正防邪降魔去外制重昏之巨障滅積劫之沉痾現不測之神通示難思之感應扶其廣業殄彼餘殃仰

史二

五

憑法力難思遂致安然入道是以或因念佛而證三昧或從坐禪而發慧門或專誦經而見法身或但行道而入聖境但以得道為意終不取定一門惟憑專志之誠非信虛誕之說問行道禮拜未具真脩祖立客春之懋佛

有磨牛之誚故智論云須菩提於石室悟了法空得先禮佛四十二章經云心道若行何用行道豁然詮旨何故非違答若行道禮拜時不生殷重既無觀慧又不專精雖身在道場而心緣異境著有為之相迷其性空起能作之心生諸我慢不了自他平等能所虛玄儻涉茲倫深當前責南泉大師云微妙淨法身具相三十二祗是不許分劑心量若無如是心一切行處乃至彈指合掌皆是正因萬善皆同無漏始得自在百丈和尚云行道禮

拜慈悲喜捨是沙門本事宛然依佛勅抵是不許執著法華懺云有二種脩一事中修若禮念行道悉皆一心無分散意二理中修所作之心心性不二觀見一切悉皆是心不得心相普賢觀經云若有晝夜六時禮十方佛

誦大乘經思第一義甚深空法於一彈指頃除百萬億那由他恒河沙劫生死之罪行此法者真是佛子從諸佛生十方諸佛及諸菩薩為其和尚是名具足菩薩戒者不須羯磨自然成就應受一切人天供養且行道一法

西天偏重繞百千匝方施一拜經云一日一夜行道志心報四恩如是等人得入道疾繞塔功德經云勇猛勤精進堅固不可壞所作速成就斯由右繞塔得妙紫金色相好莊嚴身現作天人師斯由右繞塔華嚴懺云行道

史二

六

出少過於無邊世界一一道場皆見我身南山行道儀云夫行道盡為期無定日限若論障盡佛地乃亡心灼灼如火然形翹翹如履刃儀云若從來不行道業相無因而現經云衆生如大富盲兒雖有種種寶物而不得

見今行道用功垢除心淨如翳眼開明如水
澄鏡淨衆像皆現亦如日照火珠於火便出
問諸法實相無善惡相云何有現耶答雖無
我無造無受者善惡之業亦不亡諸法無相
能示有相行者行道不念有相不念無相但

念念功成其相自現猶如盆水處於密室雖
無心分別衆像自現問相現之時真偽何辨
云何分別而取捨耶答若取如取虛空若捨
如捨虛空問有人久修不證者何耶答經云
衆生心如鏡鏡垢像不現問論云行道念佛

與坐念佛功德如何答譬如逆水張帆猶云
得往更若張帆順水速疾可知坐念一口尚
乃八十億劫罪消行念功德豈知其量故偈
云行道五百遍念佛一千聲事業常如此西
方佛自成若禮拜則屈伏無明深投覺地致

史二

七

敬之極如樹倒山崩業報差別經云禮佛一
拜從其膝下至金剛際一塵一轉輪王位獲
十種功德一者得妙色身二出言人信三處
衆無畏四諸佛護念五具大威儀六衆人親
附七諸天愛敬八具大福報九命終往生十

速證涅槃三藏勒那云發智清淨禮者良由
達佛境界慧心明利了知法界本無有闕由
我無始順於凡俗非有有想非闕想今達
自心虛通無碍故行禮佛随心現量禮於一
佛即禮一切佛禮一切佛即是禮一佛以佛

法身體用融通故禮一拜遍通法界如是香
華種種供養例同於此六道四生同作佛想
文殊云心不生滅故敬禮無所觀內行平等
外順修敬內外冥合名平等禮法華懺云當
禮拜時雖不得能禮所禮然影現法界一一

佛前皆見自身禮拜略引祖教理事分明不
可滅佛意而毀金文據偏見而傷圓旨問文
殊云心同虛空故敬禮無所觀甚深修多羅
不聞不受持如何執相稱禮佛徇文云誦經
違大士之誠言失諸佛之深旨答此雖約理

而述且無事而不顯後事而施又無理而不
圓理事相成方顯斯旨失言心同虛空故敬
禮無所觀者此是破其能所之是何者心同
虛空不見能禮無有所觀則無所禮如是禮
時非對一佛二佛心等太虛身徧法界不聞

不受持者不聞則無法義可觀不受持則非文字可記如是持經有何間斷亦是說者無示聽者無得然雖約理非為事外之理既不離事即是理中之事此乃正禮時無禮當持時不持不可依語而不依義而興斷滅偏枯

史二

八

之見乎問六念法門十種觀相雖稱助道徇想緣塵瞥起垂真何如淨念答無念一法衆行之宗敬細俱亡唯佛能淨故經云三賢十聖住果報唯佛一人居淨土况居凡地又在初心若無助道之門正道無由獨顯且六念

之法能消魔幻增進功德扶策善根十觀之門善離貪著潛清濁念密契真源皆入道之要津盡脩禪之妙軌似杖有扶危之力如船獲到岸之功力備功終船杖俱捨問首楞嚴經云持犯但束身非身無所束法句經云戒性如虛空持者為迷倒何苦堅執事相局念拘身奚不放曠縱橫虛懷履道答此破執情非祛戒德若見自持他犯起譏毀心戒為防非因防增過如斯之類實為迷倒淨名經云非淨行非垢行是菩薩行故不著持犯二邊

是真持戒大般若經云持戒比丘不昇天堂
破戒比丘不墮地獄何以故法界中無持犯
故此亦破著了諸法空事理雙持身心俱淨
又若論縱橫自在唯佛一人持淨戒其餘皆
名破戒者帶習尚被境牽現行豈逃緣縛三

史二

九

業難護放逸根深猶醉象無鈎癡猿得樹奔
波乍擁生鳥被籠若無定水戒香慧炬無由
照寂是以菩薩稟戒為師明遵佛勅雖行小
罪由懷大懼謹潔無犯輕重等持息世譏嫌
恐生疑謗夫戒為萬善之基出必由戶若無

此戒諸善功德皆不得生華嚴經云戒能開
發菩提心學是勤修功德地於戒及學常順
行一切如來所稱美薩遮尼乾子經云若不
持戒乃至不得疥癩野干身何況當得功德
法身月燈三昧經云雖有色族及多聞若無

戒智猶禽獸雖處卑下少聞見能持淨戒名
勝士智論云若人棄捨此戒雖山居苦行食
果服藥與禽獸無異若有雖處高堂大殿好
衣美食而能行此戒者得生好處及得道果
又大惡病中戒為良藥大怖畏中戒為守護

死闇冥中戒為明燈於惡道中戒為橋梁死
海水中戒為大舡又如今末代宗門中學大
乘人多輕戒律稱是執持小行失於戒急所
以大涅槃經佛臨涅槃時挾律談常則乘戒
俱急故號此經為贖常住命之重寶何以故

若無此教但取口解脫全不修行則乘戒俱
失故經云尸羅不清淨三昧不現前從定發
慧因事顯理若闢三昧慧何由成是知因戒
得定因定得慧故云贖常住命之重寶何得
滅佛壽命壞正律儀為和合海內之死屍作

長者園中之毒樹眾聖所責諸天所訶善神
不親惡鬼削跡居國王之地生作賊身處閻
羅之鄉死為獄卒諸有智者宜暫思焉問空
即罪性業本真如取相增瑕如何懺悔答若
煩惱道理遣合宜苦業二道須行事懺投身

史二

十

歸命兩淚翹誠感佛威加善根頓發似池華
得日敷榮若塵鏡遇磨光耀三障除而十二
緣滅眾罪消而五陰舍空最勝王經云求一
切智淨智不思議智不動智三藐三菩提正
偏知者亦應懺悔滅除業障何以故一切諸

法從因緣生故又經云前心起罪如雲覆空
後心滅罪如炬破暗須知炬滅暗生要須常
然懺炬彌勒所問本願經云彌勒大士善權
方便安樂之行得致無上正真之道晝夜六
時正衣束體下膝著地向於十方說此偈言

我悔一切過勸助衆道德歸命禮諸佛令得
無上慧大集經云百年垢衣可於一日浣令
鮮淨如是百劫中所集諸不善業以佛法力
故善順思惟可於一日一時盡能消滅又經
云然諸福中懺悔為最除大障故獲大善故

論云善薩懺悔銜悲滿目况不蒙大聖立斯
赦法抱罪守死長劫受殃婆沙論云若人於
一時對十方佛前代為一切衆生修行五悔
其功德若有形量者三千大千世界著不盡
高僧傳曇策於道場中行懺見七佛告曰汝

史二

十二

罪已滅於賢劫中號普明佛思大禪師行方
等懺夢梵僧四十九人命重受戒倍加精苦
了見三生智者大師於大蘇山修法華懺證
旋陀羅尼辯沙門道超於道場中修懺獨言
笑曰無價寶珠我今得矣東都英法師講華

嚴經入善導道場便遊三昧悲泣歎曰自恨多年虛廢光陰勞身心耳高僧慧成學窮三載被思大禪師訶曰君一生學問與吾炙手猶未得暖虛喪功夫示入觀音道場證解衆生語言三昧經云晝夜六時行上法者如持七

寶滿閻浮提供養於佛比前功德出過其上經云不能生難遭之想今生末世但見遺形理宜端肅涕零寫淚歎歎躬如入廟堂不見嚴父故思大禪師行方等而了見三生高僧曇策入道場而親蒙十歸智者證旋陀羅

尼辯道超獲無價寶珠此皆投身懺門歸命佛語致茲玄感頓躡聖階是以懺悔躋至等覺謂有一分無明猶如微煙故須洗滌又法身菩薩尚勤懺悔豈況業繫之身而無重垢所以十八不共法中三業清淨唯佛一人南

岳大師云修六根懺名有相安樂行直觀法空名無相安樂行妙證之時二行俱捨問結業即解脫真源罪垢不住三際何不了無生而直滅隨有作而勞功乎蒼夫罪性無體業道從緣不染而染習垢非無染而不染本來

常淨業性如是去取尤難一切衆生業通三世真慧不發被二障之所纏妙定不成爲五蓋之所覆唯圓乘佛旨須於淨處嚴建道場苦到懇誠普代有情勤行懺法內則唯憑自力外則全仰佛加遂得障盡智明雲開月朗

史二

十三

是以非內非外能悔所懺俱空而內而外性罪遮懺宛爾故菩薩皆遵至教說悔先罪而不說入過失且登地入位尚洗垢以除瑕毛道散心却談虛而拱手問淨名經云罪性不在內外中間豈是虛誑何堅不信謗正法輪

執有所作罪根實乃重增其病若佛語成諦理事分明能拔深疑善開重惑若深信者一聞千悟稱說而行既蕩前非不形後過步步觀照念念無差此乃宿習輕微善根深厚乘戒俱急理行相從斯即深達教門堅持佛語

何須事懺過自不生如若垢重障深智荒德薄但空念一切罪性不在內外中間觀其三業現行全沒根塵法內如說美食終不充飢似念藥方焉能治病若令但求其語而得罪消則一切業繫之人故應易脫何乃積劫生

死如旋火輪以知業海渺茫非般若之舟空
渡障山孤峻匪金剛之慧難傾然後身心一
如理事雙運方蕤苦種永斷業繩所以祖師
云將虛空之心合虛空之理亦無虛空之量
始得報不相酬又教云淨意如空此有二義

史三

十三

一者離虛妄取如彼淨空無有雲翳二者觸
境無滯如彼淨空不生障闕既廓心境罪垢
何生若能如是名為依教尚不見無罪豈况
有憊耶又罪性本淨是體性淨契理無緣是
方便淨因方便淨顯體性淨因體性淨成方

便淨方便淨者力行熏治體性淨者一念圓
照本末相應內外更資故須理事相扶成其
二淨正助兼懺證此一心設但念空言實難
違教不信之謗非此誰耶南山四分鈔問有
人言罪不罪不可得名戒者何耶鈔答非謂

邪見麤心言無罪也若深入諸法相行空三
昧慧眼觀故言罪不可得若肉眼所見與牛
羊無異誦大乘語者何足據焉是以理觀苦
諦事行須扶如風送船疾有所至猶膏助火
轉益光明豈同但保空言全無尅證誑他陷

已果沒阿鼻捨生受身神授業網問唯心淨
土周遍十方何得托質蓮臺寄形安養而興
取捨之念豈達無生之門欣厭情生何成平
等答唯心佛土者了心方生如來不思議境
界經云三世一切諸佛皆無所有唯依自心

菩薩若能了知諸佛及一切法皆唯心量得
隨順忍或入初地捨身速生妙喜世界或生
極樂淨佛土中故知識心方生唯心淨土著
境祇墮所緣境中既明因果無差乃知心外
無法又平等之門無生之旨雖即仰教生信

其柰力量未充觀淺心浮境強習重順生佛
國以仗勝緣忍力易成速行菩薩道起信論
云衆生初學是法欲求正信其心怯弱以住
於此娑婆世界自畏不能常值諸佛親承供
養懼謂信心難可成就意欲退者當知如來

卷二

十四

有勝方便攝護信心謂以專意念佛因緣隨
願得生他方佛土常見於佛永離惡道如修
多羅說若人專念西方極樂世界阿彌陀佛
所修善根迴向願求生彼世界即得往生常
見佛故終無有退若生彼佛真如法身常勤

修習畢竟得生住正定故往生論云遊戲地獄門者生彼國土得無生忍已還入生死國教化地獄救苦衆生以此因緣求生淨土十疑論云智者熾然求生淨土達生體不可得即真無生此謂心淨故即佛土淨愚者為生所縛聞生即作生解聞無生即作無生解不知生即無生無生即生不達此理橫相是非此是謗法邪見人也群疑論問云諸佛國土亦復皆空觀衆生如第五大何得取著有相捨此生彼答諸佛說法不離二諦以真統俗

無俗不真以俗會真萬法宛爾經云成就一切法而離諸法相成就一切法者世諦諸法也而離諸法者第一義諦無相也又經云雖知諸佛國及與衆生空常修淨土行教化諸群生汝但見說圓成實性無相之教破徧計

史

主

所執畢竟空無之文不信說依他起性因緣之教即是不信因果之人說於諸法斷滅相者摩訶衍云菩薩不離諸佛者而作是言我於因地遇惡知識毀謗般若墮於惡道經無量劫雖未得出復於一時依善知識教行念

佛三昧其時即能併遣諸障方得解脫有斯大益故不願離佛故華嚴偈云寧於無量劫具受一切苦終不遠如來不覩自在力問一生習惡積累因深如何臨終十念頓遣答那先經云國王問那先沙門言人在世間作惡

至百歲臨終時念佛死後得生佛國我不信是語那先言如持百枚大石置船上因舡故不沒人雖有本惡一時念佛不入泥犁中其小石沒者如人作惡不知念佛便入泥犁中又智度論問云臨死時少許時心云何能勝

終身行力答是心雖時頃少而心力猛利如火如毒雖少能作大事是垂死時心決定勇健故勝百歲行力是後心名為大心及諸根事急如人入陣不惜身命名為健故知善惡無定因緣體空跡有昇沉事分優劣真金一

兩勝百兩之疊華燭火微光藝萬仞之積草問心外無法佛不去來何有見佛及來迎之事答唯心念佛以唯心觀徧該萬法既了境唯心了心即佛故隨所念無非佛矣般舟三昧經云如人夢見七寶親屬歡喜覺已追念

不知在何處如是念佛此喻唯心所作即有而空故無來去又如幻非實則心佛兩亡而不無幻相則不壞心佛空有無闕即無去來不妨普見見即無見常契中道是以佛實不來心亦不去感應道交唯心自見如造罪眾

史二

十六

生感地獄相唯識論云一切如地獄問見獄卒等能為逼害事故四義皆成四義者如地獄中亦有時定度定身不定作用不定皆是唯識罪人惡業心現並無心外實銅狗鐵蛇等事世間一切事法亦復如是然遮那佛土

匪局東西若正解了然習累俱殄理量雙偕親證無生既歷聖階位居不退即不厭生死苦六道化群生如信心初具忍力未圓欲拯沈淪實難俱濟無船救溺翅弱高飛卧沉痾而欲離良醫處襁褓而擬拋慈母久遭沉墜

必死無疑但得陷已之虞未明利他之分故智論云譬如嬰兒若不近父母或墮坑落井水火等難乏乳而死須常近父母養育長大方能紹繼家業初心菩薩多願生淨土親近諸佛增長法身方能繼佛家業十方濟運有

斯益故多願往生又按諸經云生安養者緣
強地勝福備壽長蓮華化生佛親迎接便登
菩薩之位頓生如來之家永處跋致之門盡
受菩提之記身具光明妙相跡踐寶樹香臺
獻供十方寧神三昧觸耳常聞大乘之法差

史二

十七

肩皆隣補處之人念念虛玄心心靜慮煩惱
熾滅愛欲泉枯尚無惡趣之名豈有輪迴之
事安國鈔云所言極樂者有二十四種樂一
欄楯遮防樂二寶網羅空樂三樹陰通衢樂
四七寶浴池樂五八水澄漪樂六下見金沙

樂七階際光明樂八樓臺陵空樂九四蓮華
香樂十黃金為地樂十一八音常奏樂十二
晝夜雨華樂十三清晨策勵樂十四嚴持妙
華樂十五供養他方樂十六經行本國樂十七
衆鳥和鳴樂十八六時聞法樂十九存念三

寶樂二十無三惡道樂二十一有佛變化樂
二十二樹搖羅網樂二十三千國同聲樂二
十四聲聞發心樂群疑論云西方淨土有三
十種益一受用清淨佛土益一得大法樂益
三親近佛壽益四遊歷十方供佛益五於諸

佛所聞授記益六福慧資糧疾得圓滿益七
速證無上正等菩提益八諸大人等同集一
會益九常無退轉益十無量行願念念增進
益十一鸚鵡舍利宣揚法音益十二清風動
樹如衆樂益十三摩泥水旋宣說苦空益十
四諸樂音聲奏衆妙音益十五四十八願永
絕三塗益十六真金色身益十七形無醜陋
益十八具足五通益十九常住定聚益二十
無諸不善益二十一壽命長遠益二十二衣
食自然益二十三唯受衆樂益二十四三十

二相益二十五無實女人益二十六無有小
乘益二十七離於八難益二十八得三法忍
益二十九身有常光益三十得那羅延身益
如上略述法利無邊聖境非虛真談匪謬何
乃愛河浪底沉溺無憂火宅焰中焚燒不懼

史二

十八

密織癡網淺智之刀莫能揮深種疑根汎信
之力焉能拔遂即甘心伏意幸禍樂灾却非
清淨之邦顧戀恐懼之世焦蛾爛蠹自處餘
殃籠鳥鼎魚翻稱快樂故知佛力不如業力
邪因難趣正因且未脫業身終縈三障既不

愛蓮臺化質應須胎藏稟形若受肉身全身
是苦既沉三界寧免輪迴今於八苦之中略
標生死二苦一生苦者攬精血為體處生熟
藏中四十二變而成幼質上壓穢食下薰臭
坑飲冷若冰河吞熱如爐炭宛轉迷悶不可
具言及至生時衆苦無量觸手墮地如活剥
牛皮逼窄艱難似生脫龜殼銜冤抱恨擬害
母身纔觸熱風苦緣頓忘嬰孩癡騃水火橫
亡脫得成人有營身種業田既熟愛水頻滋
無明發生苦芽增長膠粘七識籠罩九居如

旋火輪循環莫已二死苦者風刀解身火大
燒體聲虛內顫鬼悸鬼驚極苦併生惡業頓
現千愁鬱悒萬怖惺惶乃至命謝氣終寂然
孤逝幽途黯黯冥路茫茫與昔冤酬皎然相
對號天扣地求脫無門隨業淺深而歷諸趣

史二

十九

繫故目連所問經云佛告目連譬如萬川長注有浮草木前不顧後後不顧前都會大海世間亦爾雖有豪貴富樂自在悉不得免生老病死祇由不信佛經後世爲人更甚困劇不能得生千佛國土是故我說無量壽佛國

易往易取而人不能修行往生反事九十六種邪道我說是人名無眼人名無耳人大集月藏經云我末法時中億億衆生起行修道未有一得者當今末法現是五濁惡世唯有淨土一門可通入路當知自行難圓他力易

就如劣士附輪王之勢飛遊四天凡質假仙藥之功昇騰三島實爲易行之道疾得相應慈旨叮嚀須銘肌骨問龐居士云事上說佛國去此十萬里大海渺無邊動即黑風起往者雖千萬達者無一二忽遇本來人不在因

緣裏如何通會而證往生若提宗考本尚不說有佛有土豈言達之不達乎所以天真自具不涉因緣匪動絲毫常冥真體若約事論故非一等九品往生上下俱達或遊化國見佛應身或生報土覩佛真體或一夕而便

登上地或經劫而方證小乘或利根鈍根或
定意散意或悟遲遠根機不同或華開早晚
時根有異今古具載凡聖俱生行相昭然明
證自驗故釋迦世尊親記文殊當生阿彌陀
佛土位登初地大集經彌勒菩薩問佛未知

史二

干

此界有幾許不退菩薩得生彼國佛言此娑
婆世界有六十七億不退菩薩皆當往生智
者大師一生修西方業所行福智二嚴悉皆
迴向臨終令門人唱起十六觀名乃合掌讚
云四十八願莊嚴淨土香臺寶樹易到無人

火車相現一念改悔者尚乃往生况戒定慧
薰修行道力終不唐捐佛梵音聲終不誑人
稱讚淨土經云十方恒河沙諸佛出廣長舌
相徧覆大千證得往主豈虛構哉問維摩經
云成就八法於此世界行無瘡疣生于淨土

何等為八饒益衆生而不望報代一切衆生
受諸苦惱所作功德盡以施之等心衆生謙
下無關於諸菩薩視之如佛所未聞經聞之
不疑不與聲聞而相違背不嫉彼供不高已
利而於其中調伏其心常省已過不訟彼短

恒以一心求諸功德如何劣行微善而得往生
答理須具足此屬大根八法無瑕成就上品
如其中下但具一法決志無移亦得下品
問觀經明十六觀門皆是攝心修定觀佛相
好諦了圓明方階淨域如何散心而能化往

史二

主

答九品經文自有昇降上下該攝不出二心
一定心如修定習觀上品往生二專心但念
名號衆善資薰迴向發願得成末品仍須一
生歸命盡報精修坐卧之間常面西向當行
道禮敬之際念佛發願之時懇苦翹誠無諸

異念如就刑戮若在狴牢怨賊所追水火所
逼一心求救願脫苦輪遠證無生廣度舍識
紹隆三寶誓報四恩如斯志誠必不虛棄如
或言行不稱信力輕微無念念相續之心有
數數間斷之意恃此懈怠臨終望往但為業
障所遮恐難值其善友風火逼迫正念不成
何以故如今是因臨終是果應須因實果則
不虛聲和則響順形直則影端故也如要臨
終十念成就但預辦津梁合集功德迴向此
時念念不虧却無慮矣夫善惡二輪苦樂二

報皆三業所造四緣所生六因所成五果所攝若一念心瞋恚邪淫即地獄業慳貪不實即餓鬼業愚癡暗蔽即畜生業我慢貢高即修羅業堅持五戒即人業精修十善即天業證悟人空即聲聞業知緣性離即緣覺業六

度齊修即菩薩業直慈平等即佛業若心淨即香臺寶樹淨刹化生心垢則丘陵坑坎穢土稟質皆是等倫之果能感增上之緣是以離自心源更無別體維摩經云欲得淨土但淨其心隨其心淨即佛土淨又經云心垢即

衆生垢心淨故衆生淨華嚴經云譬如心王寶隨心見衆色衆生心淨故得見清淨刹大集經云欲淨汝界但淨汝心故知一切歸心萬法由我欲得淨果但行淨因如水性趣下火性騰上勢數如是何足疑焉

三

三

萬善同歸集卷第二

永樂北藏

萬善同歸

第一九五冊

萬善同歸集卷第三

史三

杭州慧日永明寺智覺禪師 延壽 述

夫性起善提真如萬行終日作而無作雖無行而徧行若云有作即同魔事或執無行還歸斷滅故知自心之外無法建立十身具足

史三

四土圓收雖揔包含不壞內外皆稱法界豈隔有無空中具方便之慧不著於有有中運殊勝之行不墮於無是以即理之事行成無閼即事之理行順真如相用無虧體性斯在夫化他妙行不出十度四攝之門利己真修

無先七覺八正之道攝四念歸於一實揔四勤不出一心嚴淨五根成就五力若論施則內外咸捨言戒則大小兼持修進則身心並行具忍則生法俱備般若則境智無二禪定則動寂皆平方便則普照塵勞發願則徧含法界具力則精通十力了智則種智圓成愛語則俯順機宜同事則能隨行業運慈則親普救說法則利鈍齊收七覺則沈掉靡生八正則邪倒不起乃至備脩三堅之妙行具足七聖之法財秉持三聚之律門圓滿七淨

之真要悟天行契自然之本理脩梵行斷塵習之根源現病行憇聲聞於化城示兒行引凡夫於天界歷五位菩提之道入三德涅槃之城練三業而成三輪離三受而圓三念因後三觀薰發果具五眼圓明方能遊戲神通

出入百千三昧淨佛國土履踐無閤道場然後普應諸方現十身之妙相徧照法界然四智之明燈感應道交任他根量不動本際跡應方圓凡有見聞皆能獲益云云自彼於我何為斯皆積善之所熏成此無緣之大化還

源觀云用則波騰海沸全真體以運行體則鏡淨水澄舉隨緣而會寂肇師云統萬行則以權智為主樹德本則以六度為根濟家惑則以慈悲為首語宗極則以不二為言此皆不思議之本也至若借座燈王請飯香土室

史三

二

包乳象手接大千皆不思議之迹也然幽開雖啓聖應不同非本無以垂迹非迹無以顯本本迹雖殊而不思議一也問身為道本縛是脫因何得然指燒身背道修道高僧傳內小乘律中貶斥分明奚為聖典卷亡身沒命

為法耐思冥契大乘深詣正教大乘梵網經云若佛子應行好心先學大乘威儀經律廣開解義味見後新學菩薩有役百里千里來求大乘經律應如法為說一切苦行若燒身燒臂燒指若不燒身臂指供養諸佛非出家

菩薩乃至餓虎狼師子一切餓鬼悉應捨身肉手足而供養之然後一一次第為說正法使心開意解若不如是犯輕垢罪大乘首楞嚴經云佛告阿難若我滅後其有比丘發心決定脩三摩地能於如來形像之前身然一

燈燒一指節及於身上藝一香炷我說是人無始宿債一時耐畢長揖世間永脫諸漏雖未即明無上覺路是人於法已決定心若不為此捨身微因縱成無為必還生人酬其宿債如我馬麥正等無異所以小乘執相制而

史三

三

不開大教圓通本無定法菩薩善戒經云聲聞戒急菩薩戒緩聲聞戒寒菩薩戒開又經云聲聞持戒是菩薩破戒此之謂也若依了義經諸佛悅可執隨宜說眾聖悲嗟祗可歎大褒圓自他兼利豈容執權滯小本跡雙迷

問五熱炙身投崖赴火九十六種千聖同訶
幸有正科何投邪轍荅智論云佛法有二種
道一畢竟空道二分別好惡道若畢竟空道
者凡夫如即漏盡鮮脫如如來語即提婆達
多語無二無別一道一源是以地獄起妙覺

之心佛果現泥犁之界若指邪趣正邪正俱
非離惡著善善惡咸失若分別好惡道者愚
智不等真俗條然玉石須分金鋤可辨且約
脩行門內昇降位中自有內外宗徒邪正因
果善須甄別不可雷同且教申毀讚之文的

有抑揚之旨執即成滯了無不通四悉對治
縱奪料簡若云捻是泥輒成正真之道諸佛
錯訶若說俱非藥王愼顛倒之憊諸佛錯讚
是以興邪則成無益之行廢正則斷方便之
門須曉開遮寧無去取且內有外人遺身各

有二意內教二者一明自他性空無法我二
執不見所供之境亦無能燒之心二惟供三
寶深報四恩以助無上菩提不希人天果報
外道二者一身見不亡轉增我慢迷無作之
智眼起有得之能心二惟貪現在名聞祇規

後世福利或願作刹利之主或求生廣果之
天所以台教釋藥王焚身品云境智不二能
所斯亡以不二觀觀不二境成不二行會不
二空作是觀時若為法界見聞者益故曰乘
乘所以投岩無招外行之論赴火不為內衆

史三

四

之譏良由內有理觀外晚期心故勝熱息善
財之疑足軋生嚴熾之解篤論其道行方有
尅心正行正智邪事邪行不可廢智不可忘
後學之徒無失法利文殊問經云菩薩捨身
非是無記惟得福德是煩惱身滅故得清淨

身譬如垢衣以灰汁浣濯垢滅衣在若得圓
旨明斷皎然請鑒斯文以為龜鏡問住相布
施果結無常增有為之心背無為之道爭如
理觀福等虛空故經云佛言非我而能順理
何堅執事緣塵而不觀心達道乎若若約觀

心寓目皆是既云達道舉足寧非菩薩萬行
齊興四攝廣被不可執空害有守一疑諸華
嚴經云受一非餘魔所攝持是以捨邊趣中
還成邪見不可據宗據今認妙認玄識相施
為陰界造作應須隨機遮照任智卷舒於空

有二門不出不在真俗二諦非即非離動止何乖圓融無闕大凡諸佛菩薩修進之門有正有助有實有權理事齊修乘戒兼急悲智雙運內外相資若定立一宗是魔王之種或亡泯一切成已見之愚故大集經云有二行

史三

五

緣空直入名為慧行帶事兼脩是行行善提論有二道一方便道知諸善法二智慧道不得諸法又經云二如因中如如而無染果中如如而無垢又二心自性清淨心本有之義離垢清淨心究竟之義起信論立二相一同

相平等性義二異相幻差別義台教有二善達能所空名止善方便勸修名行善問祖佛法要惟立一乘或云十方薄伽梵一路涅槃門或云一切無閼人一道出生死如何廣陳差別立二法門惑亂正宗起諸邪見答諸佛法門雖成一種約用分二其體常同如一心法立真如生滅二門則是二諦一乘之道今古恒然無有增減是以揔別互顯本末相資非揔無以出別非別無以成揔非本無以垂末非末無以顯本故知隻翼難冲孤輪匪運

惟真不立單妄不成約體則差而無差就用則不別而別一二無闕方入不二之門空有不乖始蹈真空之境問事則分位差別理惟一味湛然性相不同云何無闕答能依之事從理而成所依之理隨事而現如千波不闕

一濕猶衆器匪隔一金體用相收卷舒一際若約圓旨不惟理事相即要理理相即亦得事事相即亦得理事不即亦得故稱隨緣自在無闕法門又且諸佛化門檀施一法為十度之首乃萬行之先入道之初因攝生之要

軌大論云檀為寶藏常隨逐人檀為破苦能與人樂檀為善御開示天道檀為善府攝諸善人檀為安隱臨命終時心不怖畏檀為慈相能濟一切檀為集樂能破苦賊檀為大將能伏慳敵檀為淨道賢聖所由檀為積善福

史三

六

德之門檀能全獲福樂之果檀為涅槃之初緣入善人衆中之要法稱譽讚歎之淵府處衆無難之功德心不悔恨之窟宅善法道行之根本種種歡樂之林藪富貴安隱之福田得道涅槃之津濟六行集云若凡夫施時起

慢心成罪行起敬心成福行若二乘施時惟觀塵動轉小菩薩施時念色體空大菩薩施時知心妄見若佛謂證惟心離念常淨是知一布施門六行成別豈可雷同一時該下亦有內施外施理檀事檀體用更資本末互顯

據理沈斷執事墮常理事融通方超二患且諸佛聖旨校量施中理檀為先內施偏重故法華經云佛言若有發心欲得阿耨多羅三藐三菩提能然手指乃至足一指供養佛塔勝以國城妻子及三千大千國土山林河池

諸珍寶物而供養者智論云若人捨身勝過閻浮提滿中珍寶則知利口輕言易述全身重寶難傾保命情深好生意切直得三輪體寐猶為通教所收况乃取捨情生豈得成其淨施且圓教施門徧含法界乃何事而不備

史三

七

何理而不圓菩薩照理而不却事鑒事而不捐理弘之在人曷滯於法若離理有事事成定性之愚若離事有理理成斷滅之執若著事而迷理則報在輪迴若體理而得事則果成究竟故法華經云又見菩薩頭目身體欣

樂施與求佛智慧若捨身是邪何成佛慧故
知毫善趣果弘深以此度門標因匪棄如釋
迦佛捨身命時度度皆證法門或得柔順忍
或入無生法忍等大凡菩薩所作皆了無我
無性涉事見理遇境知空不同凡夫造其罪

福不解因果善惡無性是為迷事取性常繫
三有問經云以三恒河沙身命布施不如受
持四句偈故知般若功深施門力劣何得違
宗越理枉力勞神可謂期悟遭迷求昇反墜
矣答得理則萬行方成知宗乃千途不滯不

可去彼取此執是排非須履無闕之門善入
徧行之道是以過去諸佛本師釋迦從無量
劫來捨無數身命或為求法則出髓而剗身
或為行慈則施鷹而飼虎般若論云如來無
量劫來捨身命財為攝持正法正法無有邊

際即無窮之因得無窮之果果即三身也乃
至西天此土菩薩高僧自古及今遺身不少
皆遵釋迦之正典盡效藥王之遺風高僧傳
謁法師入南山自剗身肉布於石上引腸掛
樹捧心而卒書偈於石云願捨此身已早令

身自在法身自在已存在諸趣中隨有利益
處護法救衆生又復業應盡有為法皆然三
界皆無常時來不自在他殺及自死終歸如
是處智者所不樂業盡於今日又僧崖菩薩
燒身云代一切衆生苦先燒其手衆人問曰

史三

八

菩薩自燒衆生罪熟各自受苦何由可代答
曰猶如燒手一念善根即能滅惡豈非代耶
又告衆曰我滅度後好供養病人並難可測
其本多是諸佛聖人乘權應化自非大心平
等何能恭敬此是實行也天台宗滿禪師一

生講誦蓮經感神人現身正定經呪文字後
焚身供養法華經又智者門人淨辯禪師於
懺堂前焚身供養普賢菩薩雙林傳大士欲
焚身救衆生苦門人等前後四十八人代師
焚身請師住世教化有情傳記廣明不能備
引若云諸聖境界示現施為則聖有誑凡之
憊凡無即聖之分教網虛設方便則空本為
接後追前令凡實證設是示現權施亦令後
人倣倣不可將邪倒之法瞞人施行大聖真
慈終不虛誑是以八萬法門無非解脫一念

微善皆翹真如自有初心後心生忍法忍未必將高斥下以下凌高善須知時自量根力不可評他美惡強立是非言是禍胎自招來業且如得忍菩薩雖證生法二空為利他故破慳貪垢尚乃燒臂焚身如藥王菩薩僧崖

史三

九

之類若未具忍者雖知以智慧火焚煩惱薪了達二空不生身見其或現行障重未得相應起勇猛心運真實行酬恩供佛代苦行慈欲成助道之門不起希求之想若不欺誑事不唐捐脫或智眼未明猶生我執但求因果

志不堅牢疑倣先宗不在此限夫衆生根機不同所尚各異故經云佛言若衆生以虛妄而得度者我亦妄語是知事出千巧理歸一源皆是大慈善權方便或因捨身命而頓入法忍或一心禪定而豁悟無生或了本清淨

而證實相門或作不淨觀而登遠離道或住七寶房舍而階聖果或處塚間樹下而趣涅槃是以塵沙度門入皆解脫無邊教網了即歸真大聖垂言終不虛設譬如涉遠以到為期不取途中強論難易故知賢不專散天不

長晴應湏九散調停陰陽兼濟遂得衆疾同
愈萬物齊榮皆是權施實無定法隨其樂欲
逗其便宜惟取證道為心不揀入門麤細若
於圓教四門生著猶為藏教初門所治故菩
薩所行檀度之門如囚因廁孔而得出似病

服不淨而獲痊非觀無以拔三毒之病根非
行無以超三界之有獄書云獲鳥者羅之一
目不可以一目為羅治國者功在一人不可
以一人為國是以衆行俱備萬善齊脩一行
歸源千門自正經明十二因緣是一法以四

等觀者得四種菩提若惟取上上根人則中
下絕分故弘半教有成滿之功至實所因化
城之力豈可捨此取彼執實謗權頓棄機緣
滅佛方便故云縱實分權權是實權開權顯
實實是權實如迷權實二門則智不自在大

史三

十

論云衆生種種因緣得度不同有禪定得度
者有持戒說法得度者有光明觸身得度者
譬如城有多門入處各別至處不異所言般
若功深者然般若孕聖弘賢含靈蘊妙標之
則為宗為首為導為依融之則觸境該空無

非般若故經云色無邊故般若無邊肇論云
三毒四倒皆悉清淨何獨尊淨於般若今何
取捨而欲逃空避影乎且諸佛密意詮旨難
裁空拳誑小兒誘度於一切無有決定法故
號大菩提不知般若若有破著之功教中偏讚
却乃隨語生見是以依方故迷故般若能導
萬行若無萬行般若何施偏敬醬而飲醎失
味致患專抱空而執斷喪智成憊智論云帝
釋意念若般若若是究竟法者行人但行般若
何用餘法佛答菩薩六波羅蜜以般若波羅

蜜用無所得法和合故此即是般若波羅蜜
若但行般若不行餘法則功德不具足不美
不妙譬如愚人不識飯食種具聞醬是眾味
主便純飲醬失味致患行者亦如是欲除著
心故但行般若反墜邪見不能增進善法若
與五波羅蜜和合則功德具足義味調適淨
伽山頂經云菩薩速疾道有二一方便道者
能為因緣二般若道者能至寂滅是以般若
無方便溺無為之坑方便無般若陷幻化之
網二輪不滯一道無虧權實雙行正宗方顯

史三

十一

住無所住佛事所以兼修得無所得智心所以恒寂問教祇令觀身無我了本無生既達性空何存身見而欲妄想仍須捨乎答理中非有事上非無從緣幻生雖無作者善惡無性業果宛然從無始際喪無數身但續俱生

無利而死今捨父母遺體豈是已身若一念圓脩戒定慧等微妙善心方真已體今所捨者乃是緣生然於事中且為利益而死況正當無明煩惱三障二死所纏何乃說空誰當信受是以佛法貴在行持不取一期口辯如

蟲食木偶得成文似鳥言空全無其旨煩惱不滅我慢翻增是惡取邪空非善達正法須親見諦言行相應但縱妄語麗心豈察潛行密用古德云行取千尺萬尺說取一寸半寸又經云言雖說空行在其中寶積經云佛言

若不修行得菩提者音聲言說亦應證得無上菩提作如是言我當作佛我當作佛以此語故無邊衆生應成正覺故知行在言前道非心外又經云佛言學我法者惟證乃知是以劇惡不如微善多虛不如少實但能行者

不棄於小心縱空說者徒標於大意若未契真如之用順法性而行惟得上慢之心自招誣罔之咎是以仁王列五忍之位智者備六即之文行位分明豈可叨濫何不入平等觀起隨喜心積衆善之根成大慈之種經云然

史三

十二

一指節藝一炷香尚滅積劫之憊瑕或散一花暫稱一佛畢至究竟之果位首楞嚴經云菩薩同事尚作奸偷屠販淫女寡婦靡所不為無生義云離相無住行人不住涅槃能普現色身在有為中能貴能賤能凡能聖行仁

義之道悲濟十方盡未來際又云凡地修聖行果地習凡因未具佛法亦不滅受而取證也明知真是俗真俗是真俗執即塵勞通爲佛事入法性三昧無一法可嫌證無邊定門無一法可棄勝負既失耳捨全乖不可障他

菩提滅自善本又縱了非身深窮實相不滯心境決定無疑雖知一切有為猶如空中鳥跡尚須地地觀練對治習氣非無况堅執四倒之愚深陷八邪之網持此穢質廣作貪淫被幻網所籠情色所醉汨沒生死沉淪苦

輪者歟所以大覺深廣垂毀摺諸聖捨身之際無不先訶如以毒藥而換醍醐似將瓦器而易珍寶故寶積經云觀身有四十種過患或云貪欲之獄恒為煩惱之所繫纏臭穢之坑常被諸蟲之所啖食似行廁而五種不

史三

上三

淨者漏囊而九孔常穿瞋恚毒蛇起害心而傷殘慧命愚癡羅刹執我見而吞敗智身猶惡賊而舉世皆嫌類死狗而諸賢並棄不堅如芭蕉水沫無常似燄影電光雖灌啖而反作冤讎每將養而罔知恩報廣誚非一難可

具言若不審此深憊遂乃廣興惡業迷斯為是而不進脩則智行兩虧理事俱失須先厭患苦切對治知非而欲火潜消了本而真源目現故法華經云猶如三界火宅所燒何由能解佛之智慧問身雖虛假衆患所纏然因此幻形能成道果經云不入煩惱大海不得無價寶珠若欲捨之恐成後悔蒼夫生必滅有相皆空若於三寶中志誠歸向起一捨心猶勝世間虛生浪死則能以無常體得金剛體以不堅身易堅固身取捨二途須憑智照

問安心入道須順真空起行度生全歸世諦
但了法性以辯正宗何乃斥實憑虛喪本迺
末有為擾動造作紛紜汨亂真源昏濁心水
荅第一義中真亦不立平等法界無佛衆生
俗諦門中不捨一法凡興有作佛事門收是

以諸佛常依二諦說法若不得世諦不得第
一義諦唯識論云撥無二諦是惡取空諸佛
說不可治者金剛經云發阿耨菩提心者於
法不說斷滅相賢首國師云真空不壞緣起
業果是故尊卑宛然金剛三昧論云真俗無

二而不守一由無二故則是一心不守一故
舉體為二華嚴經云譬如虛空於十方中若
去來今求不可得然非無虛空菩薩如是觀
一切法皆不可得然非無一切法如實無異
不失所作普示修行菩薩諸行不捨大願調

史三

十四

伏衆生轉正法輪不壞因果又云菩薩摩訶
薩了達自身及以衆生本來寂滅不驚不怖
而勤修福智無有厭足雖知一切法無有造
作而亦不捨諸法自相雖於諸境界永離貪
欲而常樂瞻奉諸佛色身雖知不由他悟入

於法而種種方便求一切智雖知諸佛國土
皆如虛空而常樂莊嚴一切佛刹雖恒觀察
無人無我而教化衆生無有疲厭雖於法界
本來不動而以神通智力現衆變化雖已成
就一切智智而脩菩薩行無有休息雖知諸

法不可言說而轉淨法輪令衆生喜雖能示
現諸佛神力而不厭捨菩薩之身雖現入於
大涅槃而一切處示現受生能作如是權實
雙行法是佛業是以若撥果排因即空見外
道據體絕用是趣寂聲聞又若立正宗何法

非宗既論法性何物非性從迷破執則權立
是非從悟辯同實無取捨今所論者不同凡
夫所執事相又非三藏菩薩偏假離真及通
教聲聞但空滅相若離空之有乃妄色之因
若離有之空歸灰斷之果今則性即相之性

卷三

十五

故不閤繁興相即性之相故無虧湛寂境是
不思議境空是第一義空舒卷同時即空而
常有存泯不壞即有而常空故台教云如鏡
有像瓦礫不現中具諸相但空即無微妙淨
法身具相三十二清涼國師云凡聖交徹即

凡心而見佛心理事雙修依本智而求佛智
古德釋云禪宗失意之後執理迷事云性本
具足何假修求但要亡情即真佛自現學法
之輩執事迷理何須孜孜修習理法合之雙
美離之兩傷理事雙修以彰圓妙休心絕念

名理行興功涉有名事行依本智者本覺智
此是因智此虛明不昧名智成前理行亡情
顯理求佛智者即無障闕解脫智此是果智
約圓明決斷為智成前事行以起行成果故
此則體性同故所以依之相用異故所以求

之但求相用不求體性前亡情理行即是除
染緣起以顯體性興功事行即是發淨緣起
以成相用無相宗云如上所說相用可然但
依本智情亡則相用自顯以本具故何須特
爾起於事行圓宗云性詮本具亡情之時但

除染分相用自顯真體若無事行彼起淨分
相用無因得生如金中雖有眾器除礦但能
顯金若不施功造作無因得成其器豈金出
礦已不造不作自然得成於器若亡情則不
假事行佛令具修豈不虛勞學者是以八地

已能離念佛勸方今起於事行知由離念不了所以文云法性真常離心念二乘於此亦能得不以此故為世尊但以甚深無閼智七勸皆是事行故是之果佛須性相具足因行必須事理雙修依本智如得金修理行如去

史三

十六

礦修事行如造作求佛智如成器也慈愍三藏錄云若言世尊說諸有為定如空華無有一物名虛妄者虛妄無形非解脫因如何世尊勅諸弟子勤修六度萬行妙因當證菩提涅槃之果豈有智者讚乾闥婆城堅實高妙

復勸諸人以免角為梯而可登陟乎由此理故雖是凡夫發菩提心行菩薩行雖然有漏修習是實是正有體虛妄非如龜毛空無一物說為虛妄皆是依他緣生幻有不同無而妄計若如是解者常行於相相不能閼速得解脫迷情局執於教不通雖求離相恒被相拘無有解脫又云若三世佛行執為妄想憑何修學而得解脫不依佛行別有所宗皆外道行古德云若一向拱手自取安隱不行仁義道即闕莊嚴多劫亦不成但實際不受一

塵佛事不捨一法還源觀云真該妄未行無
不修妄徹真源相無不寂又云真如之性法
爾隨緣萬法俱興法爾歸性祖師傳法偈云
心地隨時說菩提亦祇寧事理俱無闕當生
即不生故知真不守性順寂而萬有恒興緣

史三

十七

不失體任動而一空恒寂問思益經云入正
位者不從一地至十地楞伽經云寂滅真如
有何次第古德云寧可永劫沉淪終不求諸
聖解脫又云任汝千聖現我有天真佛何乃
捏目生華強分行位答若心冥性佛理括真

源豈假他緣尚猶忘已若隨智區分於無次
第中而立次第雖似昇降本位不動夫聖人
大寶曰位若無行位則是天魔外道若約圓
融門則順法界性本自清淨若約行布門則隨
世諦相前後淺深今圓融不礙行布頓成諸

行一地即一切地故若行布不礙圓融偏成
諸行增進諸位功德故點空論位常居中道
不有而有階降歷然有而不有泯然虛靜故
般若經云須菩提問佛若諸法畢竟無所有
云何說有一地乃至十地佛言以諸法畢竟

無所有故則有菩薩初地至十地若諸法有決定性者則無一地乃至十地是以三十七品菩薩履踐之門五十二位古佛修行之路從初念處一念圓修迄至十八不共練磨三業究竟清淨問真源自性本自圓成何籍修

行廣興動作經云見苦斷集證滅修道名為戲論若起妄修行何當契本若起信論云以有妄想心故能知名義為說真覺亦因真如內熏令此無明而有淨用復因諸佛言教力內外相資令此妄身自信已身有真如性能

起種種方便修諸對治此能修行則是信有真如由未證真不名無漏妄念若淨真性自顯又雖修無性不聞真修從妄顯真因識成智猶如影像能表鏡明若無塵勞佛道不立古德云真妄二法同是一心妄攬真成無別

史三

十六

妄故真隨妄現無別真故又真外有妄理不徧故妄外有真事無依故又若執本淨是自性癡若假外修是他性癡若內外相資是共性癡若本末俱遣是無因癡長者論云若一槩皆平則無心修道應須策修以至無修方

知萬法無修實積經云若無正修者猶兔等亦合成佛以無正修故台教云行能成智行滿智圓智能顯理理窮智寂相湏之道興廢不無因權顯實實立權亡約妄明真真成妄泯權妄既寂真實亦空非妄非權何真何實

牛頭融大師云若言修主則造作非真若言本有則萬行虛設問一切凡夫常在於定何湏數息入觀而無繩自縛乎答若法性三昧何人不具若論究竟定門惟佛方備等覺菩薩尚乃不知散心凡夫豈容測度故文殊云

譬如人學射從麕至細後乃所獲皆中我亦如是初學三昧諦緣一境後入無心三昧始一切時中常與定俱所以不淨假觀數息妙門是入甘露之津出生死之徑故龍樹祖師云觀佛十力中二力最大因業力故入生死

史三

十九

因定力故出生死正法念經云救四天下人命不如一食頃端心正意是以在纏真如昏散皆具出纏真如定慧方明捨別條然前後無濫何專理是寧斥是非問菩薩大業以攝化為基何乃獨宿孤峯入深蘭若既違本願

何成利人。答菩薩本為度他。是以先修定慧。空閑靜處。禪觀易成。少欲頭陀。能入聖道。法華經云。又見菩薩勇猛精進。入於深山。思惟佛道。問多聞廣讀。習學記持。徇義窮文。何當見性。答若隨語生見。齊文作解。執詮忘旨。逐

教迷心。指月不分。即難見性。若因言悟道。藉教明宗。諦入圓詮。深探佛意。即多聞而成實。藏積學以為智海。從凡入聖。皆因玄學之力。居危獲安。盡資妙智之功。言為入道之階。梯教是辯正之繩。墨華嚴經云。欲度衆生。令住

涅槃。不離無障閼。解脫智無障閼。解脫智不離一切法。如實覺一切法。如實覺不離無行。無生行。慧光無行。無生行。慧光不離禪善巧。決定觀察智。禪善巧。決定觀察智。不離善巧。多聞菩薩如是觀察了知。已倍故正法。勤求

修習。日夜惟願聞法。喜法。樂法。依法隨法。解法。順法。到法。住法。行法。菩薩如是勤求佛法。所有珍財。皆無吝惜。不見有物。難得可重。但於能說佛法之人生。難遭。想法華經云。若有利根智慧明了。多聞強識。乃可為說。論云有

慧無多聞是不知實相譬如大暗中有目無
所見多聞無智慧亦不知實相譬如大明中
有燈而無目多聞利智慧是所說應受無聞
無智慧是名人身牛故圓教二品方許兼讀
誦位居不退始聞法無厭聞有助觀之力學

史三

二十

成種智之功不可作牛羊之眼罔辨方隅處
愚戇之心不分菽麥乎問靈知不昧妙性常
圓何假參尋徧求知識答一切衆生悟裏生
迷真中起妄祇為不覺湏假發揚法華經云
佛曾親近百千萬億無數諸佛盡行諸佛無

量道法勇猛精進名稱普聞又云善知識者
是大因緣所謂令得見佛發阿耨多羅三藐
三菩提心華嚴經云譬如暗中寶無燈不可
見佛法無人說雖智不能了又云不要三千
大千世界滿中珍寶惟願樂聞一句未聞佛

法又云雖知諸法不由他悟而常尊敬諸善
知識起信論云又諸佛法有因有緣因緣具
足乃得成辦如木中火性是火正因若無人
知不假方便能自燒人無有是處衆生亦爾
雖有正因熏習之力若不遇諸佛菩薩善知

識等以之為緣能自斷煩惱入涅槃者則無是處法句經云如裹香之紙繫魚之索佛語諸比丘夫物本淨皆由因緣以興罪福近賢明則道義隆友愚暗則殃禍集譬如紙索近香則香繫魚則臭漸染翫習各不自覺頌曰

史三

王

鄙夫染人如近臭物漸迷習非不覺成惡賢夫染人如附香熏進智習善行成芳潔首楞嚴經云佛告阿難一切衆生從無始來種種顛倒業種自然如惡又聚諸修行人不能得成無上菩提乃至別成聲聞緣覺及成外道

諸天魔王及魔眷屬皆由不知二種根本錯亂修習猶如煮炒欲成嘉饌縱經塵劫終不能成是知初心須親道友以辨邪正方契真修或涉權門日劫相倍若得圓旨不枉功程直至道場永無疑悔及主自悟之時惟證無師自然之智決定不役人得問說法為人雖成大業未齊極地恐損自行登地菩薩尚被佛訶未證凡夫如何開演答台教初品即是凡夫若信入圓門亦可說法以凡夫心同佛所知用所生眼齊如來見般若經中校量正

憶念自修行般若之福不如廣為人天巧說
譬喻令前人易解般若其福最勝經云其人
戒足雖羸劣善能說法利多人若有供養是
人者則為供養十方佛未曾有經云說法有
二大因緣一者開化天人福無量故二者為
報施食恩故豈得不說又財施如燈但明小
室法施若日遠照天下大方廣持經云佛
言善男子佛滅度後若有法師善隨樂欲為
人說法能令菩薩學大乘者及諸大眾有發
一毛歡喜之心乃至暫下一滴淚者當知皆

是佛之神力但見解不謬冥契佛心雖為他
人亦乃化功歸已既能助道又報佛恩儻不
涉名聞實一毫不棄至於傳持法寶講唱大
乘制論釋經著文解義拔不信之疑箭照愚
暗之智光建法垣墻續佛壽命或取經西土

史三

二十二

求法邀方或翻譯大乘潤文至教或廣行經
呪徧施受持開法施之門續傳燈之燄能將
甘露沃枯渴之心善使金錚扶癡盲之眼經
云假使頂戴經塵劫身為牀座徧三千若不
傳法度衆生決定無能報恩者問何不一法

頓悟萬行自圓而迂迴漸徑勤勞小善乎禪
宗一念不生一塵不現若爭馳競水競執空
華以幻修幻終無得理答諸佛了幻方能度
幻衆生菩薩明空是以從空建立涅槃經云
佛言一切諸法皆如幻相如來在中以方便

力無所染者何以故諸佛法爾中論云以有
空義故一切法得成是以頓如種子已包漸
似芽莖旋發又如見九層之臺則可頓見要
須躡階而後得昇頓了心性即心是佛無性
不具而須積功徧修萬行又如磨鏡一時徧

磨明淨有漸萬行頓修悟則漸勝此名圓漸
非是漸圓亦是無位中位無行中得是以徹
果該因從微至著皆須慈善根力乃能自利
利他故九層之臺成於始簣千里之程託於
初步滔滔之水起於濫觴森森之樹生於毫

史三

二十三

末道不遺於小行暗弗拒於初明故一句染
神歷劫不朽一善入心萬世匪忘涅槃經云
佛說脩一善心破百種惡如少金剛能壞須
彌亦如少火能燒一切如少毒藥能害衆生
少善亦爾能破大惡日摩尼寶經云佛告迦

葉菩薩我觀衆生雖復數千巨億萬劫在欲
愛中為罪所覆若聞佛經一反念善罪即消
盡大智度論云如來成道時有十種微笑而
觀世間有小因大果小緣大報如求佛道讚
一偈一稱南無佛燒一捻香必得作佛何況

聞知諸法實相不生不滅不生不滅而
行因緣業亦不失以是故笑古德問云達磨
不與梁帝說功德因緣而云無耶菩薩捨國
城建塔廟豈虛設乎荅大師此說不壞福德
因果武帝不達有為功德而有限劑空無相

福不可思量破他貪著如不貪著盡是無為
菩薩亦作輪王如是福報因果歷然可是無
耶若達理者處之與法界同量無有竭盡若
不達理即是有為輪迴之報不應貪著忠國
師云諸佛菩薩皆具福智二嚴豈是撥無因

果但勿以理滯事以事妨理終日行而不乖
於無行也生法師問云何彈指合掌無非佛
因耶荅一切法皆無定性而所適隨緣若以
貪為緣即適人天之報若迴向善提為緣即
成佛果之報真如尚不守自性而況此微善

乎

萬善同歸集卷第三

萬善同歸集卷第四

史四

又云萬善理同無漏者夫萬善本有皆資理
發理既無異善豈容二本如來藏性為萬善
之因亦名正因親生萬善台教云如輕小善
不成佛是滅世間佛種又云善機有二一感

史四

人天華報二感佛道果報若以佛眼圓照衆
生萬善究竟得佛一大事出世之正意荆溪
尊者云一毫之善本趣菩提如操刀執炬得
其要柄若以相心如把刀抱火法華經中明
散心念佛小音讚歎指甲畫像聚沙成塔漸

積功德皆成佛道大悲經云佛告阿難若有
衆生於諸佛所一發信心種少善根終不敗
亡假使久遠百千萬億那由他劫彼一善根
必得涅槃如一滴水投大海中雖經久遠終
不虧損是以大聖順機曲應大小不忘接後

逗前半滿豈廢或讚小而引歸深極或訶半
而恐滯初門黃葉寧金空拳豈實皆是抑揚
之意權施誘度之恩而不得教旨者但執方
便之言互相是非確定取捨或執小滯大違
失本宗或據大妨小而虧權慧又雖然宗大

大旨焉明待云斥小小行空失運意則承虛託假出語則越分過頭斷正法輪謗大般若深憊極過莫越於斯歷劫何窮長淪無間淨名經云無方便慧縛有方便慧解無慧方便縛有慧方便解豈可執權謗實害有賓無但

大小雙弘空有俱運一心三觀即無過矣是以順法體則纖毫不立隨智用則大業恒興體不離用故寂而常照用不離體故照而常寂是以常體常用恒照恒寂若會旨歸宗則體用俱離何照何寂曷乃據體而碍用執性

而壞緣理事不融真俗成隔則同體之悲絕運無緣之慈靡成善惡既不同觀究親何能普救過之甚矣失莫大焉又先德云夫善知識者雖明見佛性與佛同等若論其功未齊諸聖須從今日步步資熏又古德云輩子比

史四

二

丘還債雖不得理猶有行門今時多有學人二事俱失故知見性未諦但是隨語依通及檢時中正助皆喪是以先聖終不浪階撫臆捫心豈可容易是以六即揀濫十地辨功若以即故何凡何聖若論六故凡聖天隔又若

論其理初地即具足一切地若言其行後地則倍倍超前祇如纔登八地一念利生下地多劫不及問善惡同源是非一旨云何棄惡崇善而違法性乎答若以性善性惡凡聖不移諸佛不斷性惡能現地獄之身闡提不斷性善常具佛果之體若以修善修惡就是即殊因果不同愚智有別修一念善遠階覺地起一念惡長沒苦輪若以性從緣雖同而異若泯緣從性雖異而同故禪門秘要經云佛言善惡業緣本無有異雖復不異不共俱止

華嚴經云如相與無相生死及涅槃分別各不同智無智如是故知教旨如鏡何所疑焉問若分修性則善惡二途乖平等之慈失徧行之德答自行須離約法即分化他等觀在人何別是以初心自利則損益兩陳究竟利

史商

三

他則善惡同化如夜行險道以惡人執燭豈可以人惡故而不隨其照菩薩得般若之光終不捨惡華嚴經云捨惡性人遠懈怠者輕慢亂意譏嫌惡慧是為魔業台教云惡是善資無惡亦無善法華經云惡鬼入其身罵詈

毀辱我我等念佛故皆當忍是事惡不來加
不得用念用念由於惡加又威音王佛所著
法之衆聞不輕言罵詈捶打由惡業故還值
不輕不輕教化皆得不退又提婆達多是善
知識書云善者是惡人之師惡者是善人之
資故知惡能資善非能通正豈有一法而可
捨乎問無緣不強化機熟自相應若愚惡不
信之人如何誘度答捨愚後智平等理乖棄
惡歸善同體悲廢衆生本妙不可度量忽遇
因緣機發不定設未得度亦得度緣以此而

推應須等化問若修衆善之門須興樂欲之
念憎愛二苦能障寂滅善提取捨兩情豈成
無閱解脫答涅槃經云一切衆生有二種愛
一者善愛二者不善愛不善愛者惟愚求之
善法愛者諸菩薩求華嚴經云廣大智所說
欲為諸法本應起勝希望志求無上覺又云
斷善法欲是菩薩魔事是以入道之初欲為
道本至其極位法愛須忘階降宛然初後不
濫問人法本空身心自離既無能作誰行衆
善乎答涅槃經云雖本自空亦由菩薩修空

見空又師子吼菩薩言世尊衆生五陰空無所有誰有受教修習道者佛言善男子一切衆生皆有念心慧心教心勤精進心信心定心如是等法雖念念滅猶故相似相續不斷故名修道乃至如燈雖念念滅而有光明除

史

四

破暗冥念等諸法亦復如是如衆生食雖念念滅亦能令飢者而得飽滿譬如上藥雖念念滅亦能愈病日月光明雖念念滅亦能增長草木樹林善男子汝言念念滅云何增長者心不斷故名為增長問所行衆善福德竟

何所歸若云自度還同二乘之心若云度他即立衆生之相答菩薩所作福德皆為成熟衆生空有圓融自他無滯觀世若幻豈違實相之門度生同空寧虧方便之道般若經云菩薩成就二法魔不能壞一者觀諸法空二

者不捨一切衆生論釋云以日月因緣故萬法潤生但有月而無日則萬物濕壞但有日而無月則萬物焦爛日月和合故萬物成就菩薩亦如有二道二者悲二者空佛說二事兼用雖觀一切空而不捨衆生雖憐愍衆

生不捨一切空觀一切法空空亦空故不著
空是故不妨憐愍衆生雖憐愍衆生亦不著
衆生亦不取衆生相但憐愍衆生引導入空
故問經云佛不得佛道亦不度衆生若見衆
生苦即是受苦者云何修習福德而度衆生

史四

五

乎答約真即無隨俗即有論云佛答須菩提
若一切衆生自知諸法自性空者菩薩不發
阿耨多羅三藐三菩提意亦不於六道中拔
出衆生何以故衆生自知諸法性空則無所
度譬如無病則不須藥無暗則不須燈今衆

生實不知自相空法故随心取相生著以著
故染染故隨於五欲隨五欲故為貪所覆貪
因緣故乃至作生死業無復窮已是知因凡
立聖凡聖皆空從惡得善善惡無性以無性
故萬善常興以皆空故一真恒寂問衆生之
界如二頭三手若實見度者何異撈水月而
投鏡像則鳥跡而植焦芽未審究竟以何為
衆生而興濟度答夫衆生者即是自身日夜
所起無量妄念之心大集經云汝日夜念念
常起無量百千衆生淨度三昧經云一念受

一身善念生天上人中身惡念受三惡道身
百念受百身千念受千身一日一夜種生死
根後當受八億五十萬雜類之身乃至百年
之中種後世身體骨皮毛徧大千刹土地間
無空處若一念不生恬然反本故云度妄衆

生了念即空無有起處復云不見衆生可度
亦云度盡一切衆生方成正覺即斯旨也華
嚴經云身為正法藏心為無閼燈照了諸法
空名曰度衆生既自行已立還說示人普令
觀心還依是學是為真實之慈究竟之度矣

夫從凡入聖萬善之門先發菩提心最為第
一乃衆行之首履道之初終始該羅不可暫
廢梵網經云若佛子常起大悲心乃至若見
牛馬猪羊一切畜生應心念口言汝是畜生
發菩提心而菩薩入一切處山林川野皆使

史四

六

一切衆生發菩提心若菩薩不發教化衆生
心者犯輕垢罪華嚴經云欲見十方一切佛
欲施無盡功德藏欲滅衆生諸苦惱宜應速
發菩提心又云菩提心者猶如種子能生一
切諸佛法故菩提心者猶如良田能長衆生

白淨法故善提心者猶如大地能持一切諸世間故善提心者猶如淨水能洗一切煩惱垢故善提心者猶如大風普於世間無所闕故善提心者猶如盛火能燒一切諸見薪故問善提理本性自周圓何假發心故興妄念

答般若經云若菩薩知心性即是善提而能發起大善提心是名善菩薩又上首菩薩云吾於無所求中而故求之又無所發善菩薩云知一切法皆無所發而發善提心然於所證真如如外無智能發妙智智外無如雙照雙遮

不存不泯不二而二理智似分二而不二能所俱寂次即歸命三寶無上福田起堅固心具不壞信離五怖畏成三善提最初之因緣攝一切善法大報恩經云如阿闍世王雖有逆罪應入阿鼻獄以誠心向佛故滅阿鼻罪

史四

七

是謂三寶救護力也又如在山林曠野恐怖之處若念佛功德恐怖即滅是故歸憑三寶救護不虛古德云山有玉則草木潤泉有龍則水不竭住處有三寶則善根增長謂三寶救護力也法句經云帝釋命終入驢母腹中

因歸命三寶驢羶解走破壞坏器其主打之
尋時傷胎其神却復天身佛為說偈帝釋聞
之達罪福之變解興衰之本遵寂滅之行得
須陀洹道木槌子經云時有難國王名波金
璃白佛言我國邊小頻歲賊寇五穀勇貴疾
病灾行人民困苦我恒不安法藏深廣不得
修行惟願垂矜賜我法要佛告王言若欲滅
煩惱障者當穿木槌子一百八箇常以自隨
志心無散稱南無佛陀南無達摩南無僧伽
乃至能滿百萬徧者當斷百八結業獲無上

果王聞歡喜我當奉行佛告王言有莎升比
丘誦三寶名經歷十歲得成斯陀含果漸次
修行今在普香世界作辟文佛王聞是已倍
復修行問志公云苦哉哀哉怨枉棄却真佛
造像香華供養求福不免六賊枷杖此意如
何以契今說答此是古人破凡夫不識自佛
一向外求住相迷真分別他境不為助道但
求福門似箭射空如人入暗果招生滅寧越
心塵若達惟心所見一切皆是心之相分終
不執為外來然不壞因緣理事無閑故神錯

和尚云緣衆生空不捨於大慈觀如來寂不失於敬養談實相不壞於假名論差別不破於平等又華嚴經八地菩薩親證無生法忍入無功用道了一切法如虛空性乃至涅槃心猶不現前方始見無量佛熾然供養又云

史四

若彼常於三寶中恭敬供養無疲厭則能超出四魔境速成無上佛菩提賢愚經云舍衛國有長者生一男兒當爾之時天雨七寶因字寶天後值佛出家得道佛言毘婆尸佛出現於世有一貧人雖懷喜心無供養具以一

把白石擬珠用散衆僧今此寶天比丘是乃至受無量福衣食自然今遭我世得道果證又真覺大師云深信正法勤行六度讀誦大乘行道禮拜妙味香華音聲讚唄燈燭臺觀山海泉林空中平地世間所有微塵已上悉持供養合集功德迴助菩提以知祇破凡夫心外所執或是貪利供養瞋心持戒憍慢作福勝他布施無殷重心非廣大意若如是行難招淨業不可錯會聖意斷自凡情起斷滅心滅菩提種首楞嚴經云若彼定中諸善男

子見色陰消受陰明白自謂已足忽有無端
大我慢起如是乃至慢與過慢及慢過慢或
增上慢或卑劣慢一時俱發心中尚輕十方
如來何況下位聲聞緣覺此名見勝無慧自
救悟則無咎非為聖證若作聖解則有一分

史四

九

大我慢魔入其心腑不禮塔廟摧毀經像謂
檀越言此是金銅或是土木經是樹葉或是
疊華肉身真常不自恭敬却崇土木實為顛
倒其深信者從其毀碎埋棄地中疑惧衆生
入無間獄失於正受當從淪墜但所作之時

一切無著歡喜慶幸竭力盡誠迴向無上菩
提普施法界含識則一毫之善皆是圓因終
不墮落人天因果又福業弘深凡聖俱濟福
是安樂之本智為解脫之門以此二輪不可
暫失乃成佛之正轍實拔苦之深因恭惟無

上寶王十方慈父作大福聚具功德身尚乃
親對大衆起禮骨塔躬為弟子不棄穿針豈
况下劣凡形薄福尠德闡提不信我慢貢高
取作低心頓遺小善像法決疑經云佛言若
復有人見他修福及施貧窮譏毀之言此邪

命人求覓名利出家之人何用布施但修禪定智慧之業何用紛動無益之事作是念者是魔眷屬其人命終墮大地獄經歷受苦從地獄出墮餓鬼中於五百身墮在狗中從狗出已五百世中常生貧賤受種種苦何以故

由於前世見他施時不隨喜故論云福德是菩薩摩訶薩根本能滿願一切聖人所共讚歎無智人所毀訾智人所行處無智人所遠離是福德因緣故作人王轉輪聖王天王阿羅漢辟支佛諸佛世尊大慈大悲十力四無

所畏一切種智自在無闕皆從福德中生又云須菩提問以畢竟空中無有福與非福何故但以福德而得佛答以世諦中有福故得須菩提為衆生著無所有故問佛以不著有故答所謂精進修福尚不可得何況不修福

史四

十

德如受乞食道人至一聚落從一家至一家乞食不得見一餓狗飢卧以杖打之言汝畜生無智我種種因緣家家求食尚不得何況汝卧而望得耶至於寶炬蘇燈續明供佛遂乃恒增智燄常耀身光因正果圓行成業就

故賊人偶挑殘燄天眼常明貧女因獻微燈
佛階遙記華嚴經云又放光明名照耀映蔽
一切諸天光所有暗障靡不除普為衆生作
饒益此光覺悟一切衆令執燈明供養佛以
燈供養諸佛故得成世中無上燈然諸油燈

及蘇燈亦然種種諸明炬衆香妙藥上寶燭
以是供養獲此光普廣經云然燈供養照諸
幽冥苦痛衆生蒙此光明得互相見緣此福
德拔彼衆生悉得休息施燈功德經云佛告
舍利佛若人於塔廟施燈明已臨命終時得

見四種光明一者臨終見於日輪圓滿涌出
二者見淨月輪圓滿涌出三者見諸天衆一
處而坐四者見於如來正徧知坐菩提樹垂
得菩提自見已身尊重如來合十指掌恭敬
而住或散花供養嚴飾道場盡作菩提之緣

史四

十一

因成佛之正行法華經云若人散亂心乃至
以一華供養於畫像漸見無數佛大思惟經
云若不散花獻佛雖得往生而依報不具賢
愚經云舍衛國內有豪富長者生一男兒面
首端正天雨衆華積滿舍內即字華天乃至

出家得阿羅漢阿難白佛華天何福而得如是佛言過去有佛名毘婆尸有一貧人見僧歡喜即於野澤採衆草華用散大衆爾時貧人今華天比丘是散花之德九十一劫身體端正意有所須如念而至經云若以一華散

虛空中供養十方佛乃至畢苦其福無盡論云億耳阿羅漢昔以一華施於佛塔九十一劫人天中受樂餘福力得阿羅漢或燒香塗香莊嚴佛事焚一捻而位期妙果塗故塔而身出梅檀昔佛在世時有長者名梅檀香昔

曾以香泥塗故塔後是以來九十一劫身諸毛孔出梅檀香後其口出優鉢華香或懸幡塔廟寶蓋聖儀標心而雖為他緣獲福而惟成自果故佛在世時有婆多迦過去曾作一長幡懸毘婆尸佛塔上後是以來九十一劫

天上人中常有大幡覆瘡其上受福快樂後出家得道又經云若人懸幡風吹一轉受一輪王位乃至爛壞為塵一塵一小王位百緣經云有一寶蓋長者過去曾持一摩尼寶珠蓋毘婆尸佛舍利塔頭後是以來九十一劫

天上人中常有自然寶蓋覆其頂上乃至遇
佛出家皆成佛果或稱揚佛德讚歎大乘勝
報無邊殊因最大讚一偈有超劫成佛之功
頌一言獲舌相妙音之報觀佛三昧經云昔
過去久遠無量世時有佛出世號寶威德上

史四

十三

王時有比丘與九弟子往詣佛塔禮拜佛像
見一寶像嚴顯可觀禮已諦觀說偈讚歎後
時命終悉生東方寶威德上王佛國大蓮華
中忽然化生從此以來恒得值佛得念佛三
昧佛為授記於十方面各得成佛法華經云

譬如優曇華一切皆愛樂天人所希有時時
乃一出聞法歡喜讚乃至發一言則為已供
養十方三世佛是人甚希有過於優曇華華
嚴經云又放光明名妙音此光開悟諸菩薩
能令三界所有聲聞者皆是如來音以大音

聲稱讚佛及施鈴鐸諸音樂普使世間聞佛
音是故得成此光明至於諷詠唱唄妙梵誦
揚昔婆提颺咀清響徹於淨居釋尊入定琴
訶震於石室園林樓觀入法界之法門音聲
語言成佛宗之佛事毘尼母經云佛告諸比

丘聽汝等唄唄者即言說之辭十誦律云為諸天聞唄心喜或音樂舞妓螺鈸簫韶鼓歡喜心種種供養法華經云若使人作樂擊鼓吹角貝簫笛琴箏篪琵琶鐃銅鈸如是衆妙音盡持以供養或以歡喜心誦唄誦佛德乃

史四

十三

至一小音皆已成佛道或勸請諸佛初轉法輪不般涅槃悲濟含識智論問云菩薩法爾六時勸請十方佛者若於目前面請諸佛則可今十方無量佛亦不目見云何可請答如慈心念衆生今得快樂衆生雖無所得念者

大得其福請佛說法亦復如是又雖衆生不面請佛佛常見其心亦聞彼請或隨喜讚善助他勝緣如觀買香傍染香氣雖不親作得同善根論云有人作功德見者心隨喜讚言善哉在無常世界中為癡冥所蔽能弘大心建此福德菩薩但以隨喜心過於二乘人上何況自行又菩薩晝夜六時常行三事一禮十方佛懺三世罪二隨喜十方三世諸佛所行功德三勸請諸佛初轉法輪及久住世間行此三事功德無量轉近得佛若作諸善悉

皆迴向成就菩提免墜生滅如微聲入角遂致遠聞似滴水投河即同廣潤以少善而至極果運微意而成大心或發大願者萬行之因能長慈悲不斷佛種大事成辦所作尅終成道利生皆因弘誓是以有行無願其行必

孤有願無行其願必虛行願相從自他兼利華嚴經云不發大願魔所攝持樂處寂滅斷除煩惱魔所攝持永斷生死魔所攝持捨善薩行魔所攝持不化衆生魔所攝持智論云作福無願無所樹立願為導師能有所成譬

如銷金隨師所作金無定也菩薩亦爾脩淨土願然後得之以是故知因願獲果又云若能一發心言願我當作佛滅一切衆生苦雖未斷煩惱未行難事以心口重故勝一切衆生大莊嚴論云佛國事大獨行功德不能成

史四

十四

就要須願力如牛雖力挽車要須御者能有所致淨佛國土田願引成以願力故福德增長不失不壞常見佛故或造新修故立像圖真興建伽藍莊嚴福地法華經云若人為佛故建立諸形像刻雕成衆相皆已成佛道或

以七寶成鍤鈇赤白銅白鑞及鉛錫鐵木及與泥或以膠漆布嚴飾作佛像如是諸人等皆已成佛道彩畫作佛像百福莊嚴相自作若使人皆已成佛道作佛形像經云優填王來至佛所白佛言世尊若佛滅後其有衆生

作佛形像當得何福佛告王言若當有人作佛形像功德無量不可稱計天上人中受諸快樂身體常作紫磨金色若生人中常生帝王大臣長者賢善家子乃至若作帝王王中特尊或作轉輪聖王王四天下七寶自然千

子具足乃至若生天上作六欲天主若生梵天作大梵王後皆得生無量壽國作大菩薩畢當成佛入涅槃道若當有人作佛形像獲福如是華首經云佛告舍利弗菩薩有四法終不退轉無上菩提何等為四一者若見塔

史四

十五

廟毀壞當加修治若泥乃至一磚二者若於四衢道中多人觀處起塔造像為作念佛善福之緣三者若見比丘僧二部諍訟勤求方便令其和合四者若見佛法欲壞能讀誦說乃至一偈令使不絕為護法故敬養法師專

心護法不惜身命菩薩若成就是四法者世
世當作轉輪聖王得大力身如那羅延捨四
天下而行出家能得隨意修四梵行命終生
天作大梵王乃至究竟成無上道是故獼猴
戲造石塔尚乃生天樵人悞唱佛聲猶云得

度何況志誠寧無勝報或興崇寶塔鑄瀉洪
鍾乃至太如母指天界福生或復暫擊一聲
幽途苦息無上依經云佛告阿難如帝釋天
宮住處有大飛閣名常勝殿種種寶莊各八
萬四千若有清信男子女人造作如是常勝

寶殿百千拘胝施與四方衆僧若復有人如
來般涅槃後取舍利如芥子大造塔如阿摩
羅子大戴刹如針大露盤如棗葉大造佛形
像如麥子大此功德勝前所說百分不及一
千萬億分乃至阿僧祇數分所不及一何以

故如來無量功德故涅槃經云善守佛僧物
塗掃佛僧地造塔如母指常生歡喜心亦生
不動國此即淨土常嚴不為三灾所動也或
書寫大藏啓發真詮或刻石銷金剥皮刺血
令見聞隨喜十種傳通誓報四恩明遵慈勅

是以佛智讚而不及天福報而無窮齊善逝之功作如來之使法華經云若人得聞此法華經若自書若使人書所得功德以佛智慧籌量多少不得其邊或興崇三寶廣扇慈風或墻漸釋門威力外護遂令正法久住佛道

史四

十六

常隆外感則雨順風調家寧國泰內報則道生垢滅果滿因圓能遵付囑之恩不失菩提之記或釋其拘繫放人出家或廣度僧尼紹隆佛種開出離之道施引接之門格量勝因群經具讚出家功德經云若放男女奴婢人

民出家功德無量本緣經云以一日一夜出家故二十劫不墮三惡道僧祇律云以一日一夜出家修梵行者離六百六十六歲三塗苦乃至醉中剃髮戲裏披衣一鄉時間當期道果何況割慈捨愛具足正因成菩薩僧福何邊際或忘身為法禁絕邪師建正法幢斷魔罣索朗慧日於無明暗室蔭慈雲於煩惱稠林使信邪者趲三脫之門俾執見者裂八倒之網或成他大業助發菩提作增上之緣為不請之友涅槃經云助人發菩提心者

許破五戒故知損已為他是大士之行或飯僧設供資備修行開大施之門建無遮之會是以減一匙之飯七返生天施一團之麩覓登王位或造經房禪室或施華果園林供給所須助成道業昔支辨安禪道侶致天樂自

史四

十七

然日給誦經沙彌獲掄持第一大報恩經云若以飯食瓔珞施人除去瞋心以是因緣獲得二相一者金色二者常光乃至掃塔塗地給侍眾僧起恭敬心成慙重業發一念之微善成無邊之淨緣菩薩本行經云昔佛在世

時有阿羅漢婆多竭黎觀因地曾洒掃定光佛古塔誅伐草木嚴淨已訖踊躍歡喜繞之八帀作禮而去命終之後生光音天盡其天壽乃至百返作轉輪聖王顏容端正見者歡喜欲行之時道路自淨九十劫中天上人間

富貴尊榮快樂無極今最後身值釋迦佛捨豪出家得阿羅漢若有人能於佛法僧少作微善如毫髮許所生之處受報弘大無有窮盡正法念經云若有眾生淨心供養眾生掃如來塔命終生意樂天身無骨肉亦無汙垢

香氣能熏一百由旬其身淨潔猶如明鏡付法傳云有一比丘毬多觀其無福不能得道令教化供僧便證阿羅漢果又有羅漢名祇夜多具三明六通觀見前生曾作狗身未曾暫得一飽常忍飢渴遂每躬自執爨供給衆

僧大報恩經云思惟諸法甚深之義樂修善法供養父母和尚師長有德之人若行道路佛塔僧房除去磚石荆棘不淨以是因緣得三十二相中一一毛右旋相乃至看病浴僧義井園廁扶危拯急濟用備時皆大菩薩之

心成不思議之行利他既重得果偏深或永受堅固不壞之形或常得清淨相好之體或往生佛國甘露之界或頓獲輕安自在之身皆三十二相之殊因八十種好之妙果大方便佛報恩經云三業清淨瞻病施樂破除憍

史四

六

慢飲食知足以是因緣得三十二相中平立相福田經云佛告大帝我昔於波羅奈國安設園廁緣此功德世世清淨累劫行道穢染不汙金色晃昱塵垢不著食自消化無便利之患百緣經云孫陀利比丘過去作長者因

備辦香水澡浴衆生復以珍寶投之水中今
所生之時舍內自然有一涌泉香水冷美有
諸珍寶充滿其中端正殊妙後出家得道賢
愚經云昔有五百賈客入海採寶請一五戒
優婆塞用作導師海神取水一掬而問之曰
掬中水多海水多耶賢者荅曰掬中水多海
水雖多却欲盡時必有枯竭若復有人能以
一掬水供養三寶或奉父母或匄貧窮給與
禽獸此之功德歷劫不盡以此言之知海水
少掬水多海神歡喜即以珍寶用贈賢者以

知一切萬物惟應濟急利時如若不用雖多
無益經云若種樹園林造井廁橋梁是人所
為福晝夜常增長高僧傳云道安法師感聖
僧語曰汝行解過人祇緣少福能浴衆僧所
願必果或平治坑塹開通道路或造立船筏
興置橋梁或於要道建造亭臺或在路傍栽
植華果濟往來之疲乏備人畜之所行六度
門中深發弘揚之志八福田內普運慈濟之
心一念善因能招二報一者華報受人天之
快樂二者果報證祖佛之真源或施食給漿

史四

十九

病緣湯藥住處衣服一切所須安樂有情是諸佛之家業撫綏沉溺乃大士之常儀遂使施一訶梨受九十劫之福樂分一口食得千倍之資持經云施食得五種利益一者施命二者施色三者施力四者施安五者施辨智度論云鬼神得人一口之食而千萬倍出華嚴經云又放光明名安隱此光能照疾病者令除一切諸苦痛悉得正定三昧樂施以良藥救衆患妙寶延命香塗體蘇油乳蜜充飮食以是得成此光明或施無畏善和諍訟哀

愍孤露救拔艱危福受梵天行齊大覺因強果勝德厚報深華嚴經云又放光明名無畏此光照觸恐怖者非人所持諸毒害一切皆令疾除滅能於衆生施無畏遇有惱害皆勸止拯濟危難孤窮者以是得成此光明又慈悲喜捨種種利益度貧代苦軫念垂哀乃施畱生一搏之食皆是佛業無緣慈因法句經云行慈有十一種利佛說偈言履行仁慈博愛濟衆有十一譽福常隨身卧安覺安不見惡夢天護人愛不毒不共水火不長在所得

利死昇梵天是為十一故經云一切聲聞緣覺菩薩諸佛所有善根慈為根本毘沙論云若修慈者火不能燒刀不能傷毒不能害水不能漂他不能殺所以然者慈心定是不害法故有大威勢諸天擁護害不能害像法決

史四

二十

疑經云佛言若人於阿僧祇劫以身供養十方諸佛并諸菩薩及聲聞眾不如有人施與畜生一口之食其施勝彼百千萬倍無量無邊丈夫論云悲心施一人功德如大地為已施一切得報如芥子救一厄難人勝如一切

施眾生雖有光不如一月明華嚴經云菩薩乃至施與畜生之食一搏一粒成作是願當令此等捨畜生道利益安樂究竟鮮脫永度苦海永滅苦受永除苦蘊永斷苦覺苦聚苦行苦因苦本及諸苦處願彼眾生皆得捨離

善薩如是專心繫念一切眾生以彼善根而為上首為其迴向一切種智大涅槃經云佛過去惟修一慈經此劫世七返成壞不來生此世界壞時生光音天世界成時生梵天中作天梵王三十六反為天帝釋無量百千世

作轉輪聖王乃至成佛又師子現指醉象禮
足慈母遇子盲賊得明城變金璃石舉空界
釋女瘡合調達病瘥皆是本師積劫熏修慈
善根力能令若者見如是事今既承紹合履
玄蹤乃至放生贖命止殺興哀斷燒煮之殃

史四

二十一

釋籠罩之熱續壽量之海成慧命之因遂得
水陸全形息陷網吞鈎之苦飛沉任性脫焚
林竭澤之憂免使冗罷新胎巢無舊卵脂消
鼎鑊肉碎刀砧梵網經云若佛子以慈心故
行放生業一切男子是我父一切女人是我

母我生生無不從之受生故六道衆生皆是我
我父母而殺食者即殺我父母亦殺我故身
一切地水是我先身一切火風是我本體故
常行放生乃至若不爾者犯輕垢罪故知有
情無情不可傷害華嚴經云佛子菩薩摩訶

薩作大國王於法自在普行教命令除殺業
閻浮提內城邑聚落一切屠殺皆令禁斷無
足二足多足種種生類普施無畏無欺奪心
廣修一切諸行仁慈莊物不行侵惱發妙實
心安隱衆生於諸佛所立深志樂常自安住

三種淨戒亦令衆生皆如是住菩薩摩訶薩
令諸衆生住於五戒永斷殺業以此善根如
是迴向所謂願一切衆生發菩薩心具足智
慧永保壽命無有終盡乃至見衆生心懷殘
忍損諸人畜所有男形令身缺減受諸楚毒

見是事已起大慈悲而哀救之令閻浮提一
切人民皆捨此業涅槃經云一切惜身命無
不畏刀杖怨已以為喻勿殺勿行杖音有禪
僧鄧隱峯未出家時曾射一獐子墮地而斃
須臾獐母亦墮而死因剖腹開見肝腸寸寸

而斷遂捨其射業因此出家是知人形獸質
受報千差愛結情根其類一等所以失林窮
虎乃委命於廬中鍛翻驚禽遂投身於案側
至於楊生養雀寧有意於玉環孔氏放龜本
無情於金印命既無於大小罪豈隔於賢愚

史四

三

三業施為切宜兢慎慎傷慎殺尚存餘殃故
作故為寧逃業迹或受一日戒或持八閔齋
或不取有情或永斷葷血不值三灾之地能
昇六欲之天既為長壽之緣又積大慈之種
經云昔有迦羅越興設大檀請佛及僧時有

一人賣酪主人駐食勸令持齋聽經至冥乃歸婦語之言我朝來不食相待至今遂破夫齋半齋之福猶生天上七世人間常得自然衣食一日持齋得六十萬歲自然之糧又有五福一者少病二者身意安隱三者少媼四者少睡卧五者命終之後神得生天常識宿命或懷慚抱愧常生慶幸之心識分之恩恒起報酬之想雜阿含經云爾時世尊告諸比丘有二淨法能護世間何等為二所謂慚愧假使世間無此二淨法者世間亦不知有父

母兄弟姊妹妻子宗親師長尊卑之緒顛倒混亂如畜生趣即說偈言世間若無有慚愧二法者違越清淨道向生老病死世間若成就慚愧二法者增長清淨道永關生死門或代誅贖罪沒命救人或釋放狴牢赦宥刑罰

史四

二十三

或歸復遷客招召逋民或停置關防放諸商稅或給濟貧病撫恤孤惻常以仁恕居懷恒將惠愛為念若覺若夢不忘慈心乃至蠕動蛸飛普皆覆護華嚴經云佛子菩薩摩訶薩見有獄囚五處被縛受諸苦毒防衛驅迫將

之死地欲斷其命乃至自捨身命受諸苦毒
菩薩爾時語主者言我願捨身以代彼命如
此等苦可以與我如彼人隨意皆作設遇彼
苦阿僧祇倍我亦當受令其解脫我若見彼
將被殺害不捨身命救贖其苦則不名為住

菩薩心何以故我為救護一切衆生護一切
智善提心故正法念經云造一阡寺不如救
一人命墮藍本經校量衆福捨不如慈心愍
傷一切蠱劫含識之類其福最勝或盡忠立
孝濟國治家行謙讓之風履溫恭之道敬養

父母成第一之福田承事尊賢開生天之淨
路賢愚經云佛語阿難出家在家慈心孝順
供養父母計其功德殊勝難量所以者何我
自憶念過去世時慈心孝順供養父母乃至
身肉濟活父母危急之厄以是功德上為天

帝下為聖王乃至成佛三界特尊皆由斯福
或稱揚彼德開舉善之門或讚歎其名發薦
賢之路成人之美助發勇心喜他之榮同興
好事削嫉妬之蠱刺息忿恨之毒風起四無
量之心攝物同已成四安樂之行利益有情

是以諸大菩薩皆思往世波騰苦海作諸不
利益事捐功喪力惟長業芽今省前非頓行
佛道深精進甲發金剛心衆善普行廣興法
利入世間三昧現功巧神通和光同塵潛行
密用滅無明火摧憍慢幢曲順機宜和顏誘

史

二

誨愛語攝受慈眼顧瞻開諭愚盲安慰驚恐
懸照世之日耀破暗之燈揭有獄之重開沃
火宅之熾燄滿求者之願若如意之珠拔病
者之根猶善見之藥乾欲海而成悲海
輪而成智輪變貧窮濟作福德之津輪生死

野合善提之道諸佛法內靡所不為衆生界
中無所不濟如地所載如橋所昇如風所持
如水所潤如火所熟如春所生如空所容如
雲所覆遂令聞名脫苦蹈影獲安觸光而身
垢輕清憶念而心遠調伏皆是從微至著漸
積善根行滿功圓成其大事何乃毀善業道
開惡趣門成就魔羅斷滅佛種

萬善同歸集卷第四

萬善同歸集卷第五

史五

杭州慧日永明寺智覺禪師 延壽 述

夫一念頌圓三德悉備未有一法能越心源
設脩萬行皆從真法界之所成或治習氣而
用佛知見之所斷所為無成之成何妨妙行

史五

不斷之斷豈閼圓修極惡違境尚為助發知
識美德嘉善寧非進趣道乎問何不直明本
際則本立而道生若廣述行門恐生迂滯答
理為道本行為道跡因本垂跡無本跡何所
施因跡顯本無跡本奚獨立故云本跡雖殊

永樂北藏

萬善同歸

不思議一也是知先明其宗方能進道若一
向逐末實有所妨經云非不了真如而能成
其行猶如幻事等侶有而非真且圓根頓受
之人則遮照而無滯即遮而照故雙非即是
雙行即照而遮故雙行即是雙遣不壞本而
常末萬行紛然不壞末而常本一心恒寂問
法句經云若能心不起精進無有涯何故立
事興心而乖無作道乎答即心無心事不妨
理作而無作性不閼緣故賢首國師云緣起
體寂起恒不起達體隨緣不起恒起大集經

第一九五冊

云佛言精進有二種一始發精進二終成精進菩薩以始發精進習成一切善法以終成精進分別一切法不得自性金光明經中雖得佛果精進不休故於衆中起禮身骨況餘凡下端拱成耶故十八不共法中精進無減

大論云菩薩知一切精進皆是虛妄而常成就不退是名真實精進問一切法空悉宗無相何陳衆善起有相之心耶答以諸法畢竟無所有故則有萬善施為若諸法有決定性者則一切不立故般若經云若諸法不空即

無道無果法句經云菩薩於畢竟空中熾然建立金剛三昧經云若說法有一是相如毛輪如焰水迷倒為諸虛妄故若見於法無是法同虛空如盲無目倒說法如龜毛又經云寧可謗有如須彌不可謗無如芥子論云諸

史五

二

法實相中決定相不可得故名無所得非無有福德智慧增益善根又云邪見人破諸法令空觀空人知諸法真空不破不壞譬如田舍人初不識鹽見貴人以鹽著種種肉菜中而食問言何以故爾語言此鹽能令諸物味

美故此人便念此鹽能令諸物美自味必多
便空抄鹽滿口食之鹹苦傷口而問言汝何
以言鹽能作美貴人語言癡人此當籌量多
少和之令美云何純食鹽無智人聞空解脫
門不行諸功德但欲得空是為邪見斷諸善

根廬山遠大師釋涅槃經問云若無所得云
何作善佛答明諸眾生現有佛性當必因果
如子在胎定生不久理須修善又問我今不
知所趣入處云何作善佛答有如來藏可以
趣入宜修善業弘明集云或有惡趣於空以

生斷見說之於口若同用之於心則異正法
以空去其貪邪說以空資其愛大士體空而
進德小人說空而退善良由反用正言以生
邪執矣不觀空以遣累但取空而廢善又善
惡諸法等空無相而善法助道惡法生障故

史五

三

知萬法真性同一如矣無妨因緣法中有萬
殊矣故經云深信因果不謗大乘三世因果
佛不誑欺十力勸誡聞當不疑而謂善惡都
空無損益乎夫法顯明了無法不悉舌相廣
長言無不實其析有也則一毫為萬其等空

也則萬像皆一防斷常之生尤兼空有而除疾非聖者必凶順逆者終吉勿謂不信有如皎日故中論云諸佛說空法為始於有故若復著於空諸佛所不化金剛三昧經云若離無取有破有取空此偽妄空而非真無今雖離有而不存空如是乃得諸法真無故肇論云若以有為有則以無為無有佛不有則無無也夫不存無以觀法者可謂見法實性矣何得以空害有以有害空乖一味之源成二見之垢乎並是依語失義遺智存情雖言破

有未達有源強復執空罔窮空旨今畧辨之以消邪滯夫有是不有之有非實有空是不空之空非斷空若決定為有非是幻有而生隔闕若虛豁為空即同太虛而無妙用所以從緣而有無性故空無性之空空不闕有從緣之有有不妨空有因空立成緣智而萬行沸騰空從空生起妙慧而一真虛寂豈同執但空而生斷見福海傾消據實有而起常心慢山高峙是以諸佛說空為空無明而成福業破偏計而了圓成愚人說空即生妄解而

謗佛意增空見而滅善因又斷滅空則無善
無惡無因無果第一義空有業有報不見作
者問何不深入無生自然合道有為多過豈
益初心答因世慈而入真慈從生忍而具法
忍學分初後位豈濫陳又生即無生豈越性

史五

四

空之地無為即為寧逃實相之源但取捨情
亡即真俗理見故經云菩薩不盡有為不住
無為肇法師云有為雖偽捨之則大業不成
無為雖實住之則慧心不朗華嚴經云解如
來身非如虛空一切功德無量妙法所圓滿

故大集經云捨離大慈而觀無生是為魔業
厭離有為功德是為魔業問無漏性德本自
具足何假外修而虧內善答自有修性二德
內外二緣若性德本具如木中火不成事用
須假修德如遇因緣方能顯現是以因修顯

性以性成修若本無性修亦不成修性無二
和合方備又內有本覺常熏聖種外仗善緣
助開覺智有內闕外菩提不圓華嚴經云法
如是故內因有本佛神力故外緣所加是以
若修萬善則順法性以淨奪染性德方起凡

夫雖具以造惡違性本性不顯不成妙用問
忘緣頓入教有明文今何所非而逐因緣法
乎荅頓教一門亦是上根所受忘緣淨意真
為如實修行今所該者為著法之人而生偏
見一向毀事不了圓宗但析妄情豈除教道

史五

五

祇如見佛一法自有五等教人一小乘人見
佛身即是父母生身從心外來有相好分濟
意識所熏有所分別不知唯識義故見從外
來二大乘初教見佛但是現化非有相好然
其實體空無所有故云若以三十二相觀如

來者轉輪聖王即是如來三大乘終教見佛
相好光明一一悉同真性身即非身非身即
身理事無閼四頓教見佛無有始末之異何
有現應之差亦無相好可立一切分別非真
理故此離念之真名為見佛五一乘圓教見
佛即此離念之真非但不生彼相之理而乃
不閼萬像繁興具足依正該攝理事人法等
圓明一事徧於十方一切世界無不同時影
現猶如帝網又緣起一門若是頓教不說緣
起即是事相令真理不現要由相盡乃是實

性若說緣起如以翳眼而見空華若是圓教法界起必一多互攝有力無力方得成立一多無闕攝入同時名入大緣起如是五門皆是入路尚不訶小恐廢權門何乃斥圓而防實德台教云如大乘師不弘小教則失佛方

便祇如古德設有邊辟之言皆是為物遺執今時但效其言罔知其旨又全未入於頓門但妄生譏謗所失太過故今愍之故圓教華嚴經離世間品云佛子菩薩摩訶薩又作是念阿耨多羅三藐三菩提以心為本心若清

淨則能圓滿一切善根於佛菩提必得自在欲成阿耨多羅三藐三菩提隨意即成若欲除斷一切取緣住一向道我亦能得而我不斷為欲究竟佛菩提故亦不即證無上菩提何以故為滿本願盡一切世界行菩薩行化

史五

六

衆生故是為如金剛大乘誓願心是以驟緣遺性積雜染而為凡離緣求證沈偏空而成小緣性無闕即大菩提不離塵勞門能成無為種不溺實際海能隨有作波真俗鎔融有無不滯可謂履非道而達正道即世法而具

佛法矣問萬善威儀聲聞劣行迂滯化壘跏
伏草庵豈稱大心何成圓頓答三乘初學不
愚於法所以法華經云若有比丘實得阿羅
漢若不信此法無有是處又云汝等所行是
菩薩道漸漸脩學悉當成佛皆是中途取證

起住著心是以諸佛所訶勸令起行且二乘
之人皆登聖位超九地之煩惱斷三界之業
身同坐解脫之牀已具神通之慧豈比博地
具縛凡夫惟向依通全無修證故真覺大師
云二乘何咎而欲不脩教中或毀或讚抑揚

當時耳凡夫不了預畏被訶寧知見愛尚存
去小乘而甚遠雖復言其脩道惑使之所不
除非惟身口未端亦乃心由邪曲見生自意
解背真詮聖教之所不依明師未曾承受根
緣非為宿習見解未預生知而能世智辯聰

史五

七

談論以之終日時復牽於經語曲會私心綴
邪說以誑愚人撥因果而排罪福順情則熙
怡生喜逆意則慍懣懷瞋三受之狀固然稱
位乃儔菩薩初篇之非未免過人之豐又縈
大乘之所不脩而復譏於小學恣一時之強

口謗說之患鏗然三途苦輪報之長劫書云
古人當言而懼教言而憂又云止沸莫若去
薪息過莫若無語又如經說凡夫有漏散心
一稱南無佛乃至小低頭以此因緣尚成佛
道何況二乘無漏聖心永斷後有身親證人

空慧所習諸行而不登正位乎問有功之功
皆歸敗壞無功之功至功常存何乃棄不遷
之旨而述有作之行乎答肇論云如來功流
萬世而常存道通百劫而弥固經云三灾彌
綸而行業湛然今信之矣故知一毫之善雖

是有為若助菩提直至成佛而不墮壞任大
劫火競起終不燒虛空縱生死浪無邊實不
沉真善問諸法無體從緣幻生衆緣無依還
從法起緣法無性必竟俱虛無主無人無生
無滅如何廣論無常之事相復說虛妄之果

報乎答以真心不守自性隨緣成諸有雖偈
有即空乃體虛成事猶如樹影雖虛而有陰
覆之義還同昏夢不實亦生憂喜之情雖無
作者之能為不失因緣之果報故淨名經云
無我無造無受者善惡之業亦不亡又教所

明空以不可得故無實性故不是斷滅之無
何起龜毛兔角之心作蛇足鹽香之見問初
心入道言行相扶萬善資勲不無其理果地
究竟大事已終境智虛閑何須衆行乎答果
得佛位畢竟無為若無邊行門八相成道皆

史五

是佛後普賢行收任運常然盡未來際維摩
經云雖得佛道轉于法輪入於涅槃而不捨
於菩薩之道是菩薩行華嚴經云了知法界
無有邊際一切諸法一相無相是則說名究
竟法界不捨菩薩道雖知法界無有邊際而

知一切種種異相起大悲心度諸衆生盡未
來際無有疲厭是則說名普賢菩薩問五度
如盲般若如導今則偏讚衆行廣明散善乎
答今所論衆善者祇為成就般若故教中或
訶有為但是破其貧執如若取捨不生一切
無闕若未明般若以萬行為助緣法華經云
佛名聞十方廣饒益衆生一切具善根以助
無上心華嚴經云譬如一切法衆緣故生起
見佛亦復然必假衆善業若已明般若用衆
行為嚴飾法華經云其車高廣衆寶裝校乃

至又多僕從而侍衛之故云萬善同歸集離
般若外更無一法如衆川投滄海皆同一味
雜鳥近妙高更無異色或不謂般若但習有
為祇成生死之因豈得涅槃之果若布施無
般若惟得一世榮後受餘殃債若持戒無般

史五

九

若暫生上欲界還墮泥犁中若忍辱無般若
報得端正形不證寂滅忍若精進無般若徒
興生滅功不趣真常海若禪定無般若但行
色界禪不入金剛定若萬善無般若空成有
漏因不契無為果故知般若若足險惡徑中之

導師迷闇室中之明炬生死海中之智楫煩
惱病中之良醫碎邪山之大風破魔軍之猛
將照幽途之赫日驚昏識之迅雷抉愚盲之
金鏡沃渴愛之甘露截癡網之慧刃給貧乏
之寶珠若般若不明萬行虛設祖師云不識

玄旨徒勞念靜不可刹那忘照率爾相違乃
至成佛究竟位中定慧力莊嚴以此度含識
故佛云我於一夜中間常說般若問諸法寂
滅相不可以言宣何不直指其事而廣涉因
緣興諸問答乎答楞伽經云佛告大慧若不

說一切法者教法則壞教法壞者則無諸佛菩薩圓覺聲聞若無者誰說為誰是故大慧菩薩摩訶薩莫著言說隨宜方便廣演諸法故知摠持無文字文字顯摠持離理無說離說無理以真性普徧故不可說不異可說以

緣修無性故可說不異不可說若說四實性及諸法自相皆不可說若依四悉檀及諸法共相皆是可說是以諸佛常依二諦說法但得圓旨說即無過若一向無言何由悟解令尋言求理而之理圓但為言徧故云言說不

及不說無言又性雖離言不可說要以言說方會不可說也若夫履踐道源諸佛種先明般若以辨真心般若乃萬行之師千聖之母真心是群生之本衆法之源若般若未通真心由昧應須皈命一體三寶懺悔三世懋

史五

十

瑕以尸羅而檢過防非用禪定而除昏憒亂親近善友讚誦大乘萬善熏治多聞修習助顯真性直至菩提障盡而妙定自明慧發而真心豁淨既能自利復愍未聞廣作福因具行諸度紹佛家業建大法幢注一味之法雨

蕩諸惑塵然無作之智燈照開迷闇是以功德萬行初後並興於諸佛教中法爾如是故華嚴經云菩薩摩訶薩不作遍惱衆生物但說利益世間事法華經云若人受持讀誦是經為他人說若自書若教人書復能起塔及

造僧房供養讚歎聲聞衆僧亦以百千萬億讚歎之法讚歎菩薩功德又為他人種種因緣隨宜解說此法華經復能清淨持戒與柔和者而共同止忍辱無瞋志念堅固常貴坐禪得諸深定精進勇猛攝諸善法利根智慧

善答問難乃至是人若坐若立若行處此中便應起答一切天人皆應供養如佛之塔大凡善法略有四種一自性善無貪癡瞋等三善根二相應善善心起時心王心所一時俱起三發起善發身語業表內心所思四第一

史

十一

義善體性清淨又略有二種一理善即第一義二事善即六度萬行今時多據理善若是理善闡提亦具何不成佛是以須行事善莊嚴顯理積大福德方成妙身如鑛藏金俚山藏玉若石蘊火猶地生泉未遇因緣不成濟

用雖然本具有亦同無衆生三因亦復如是
凡曰有心正因悉具未得緣了法身不成了
因智慧莊嚴正解觀察緣因福德莊嚴妙行
資發三因具足十號昭然自利利他理窮於
此故法華經云我以相嚴身光明照世間一
切衆所尊為說實相印又薄德少福人不堪
受此法夫善根易失惡業難除涅槃經云譬
如畫石其文常在畫水速滅勢不久住瞋如
畫石諸善根本如彼畫水是故此心難得調
伏故知善事易忘人身難得不可因循剎那

異世提謂經云如有一人在須彌山上以纖
縷下之一人在下持針迎之中有旋嵐猛風
吹縷難入針孔人身難得甚過於是又菩薩
處胎經云盲龜浮木孔時時猶可值人一失
命根億劫復難是海水深廣大三百三十六
一針沒海底求之尚可得又云吾從無數劫
往來生死道捨身復受身不離胞胎法計我
所經歷記一不記餘純作白狗身積骨億須
彌以利針地種無不值我體何況雜色狗其
數不可量吾故攝其心不貪著放逸是以暫

得人身於十二時中不可頃刻忘善刹那長惡此便難逢豈容空過又無常迅速念念遷移石火風燈逝波殘照露華電影不足為喻法句經云佛告梵志世有四事不可得久一者有常必無常二者富貴必貧賤三者合會

史五

十三

必別離四者強健必當死又經云非空非海中非入山石間無有地方所脫之不受死如上所明萬德衆善菩提資糧惟除二法能成障闕一者不信二者瞋恚不信障末行善欲行善瞋恚滅已行善現行善以不信故如同

敗種永斷善根墮壞正宗增長邪見以瞋恚故焚燒功德遮障菩提開惡趣門閉人天路又不瞋從慈而起大信因智而成智刃纔揮疑根頓斷慈雲既潤瞋火潜消是以因智度苦海之津因信入菩提之戶因慈住大覺之

室因忍披如來之衣華嚴經云信為道元功德母長養一切諸善法信能增長智功德信能必到如來地信令諸根明淨利信力堅固無能壞信能永滅煩惱本信能專向佛功德信為功德不壞種信能生長菩提樹信能增

益最勝智信能示現一切佛大莊嚴法門經云瞋恨者能滅百劫所作善業華嚴經云菩薩起一瞋心能生百萬障門又經云劫功德賊無過瞋恚又意地起瞋大道冤賊問凡脩萬善皆助菩提云何有稽滯不成復云何速

史五

十三

得圓滿答因放逸懈怠故無成因勇猛精進故速辦譬喻經云有一比丘飽食入室閉戶靜眠受身快樂却後七日其命將終佛慙傷之告比丘言汝維衛佛時曾得出家不念經戒飽食却眠命終魂神生蜈蚣蟲中積五萬

歲壽盡復為螺蚌之蟲樹中蠹蟲各五萬歲此四品蟲生在冥中貪身愛念樂處幽隱為家不喜光明一眠之時百歲乃覺纏綿罪網不求出要今始罪畢得為沙門如何睡眠不知厭足比丘聞已慙怖自責五蓋即除成阿

羅漢大寶積經云佛言譬如綵帛繫在頭上火來燒綵帛無暇救火何以故寃實理急此上一親明教旨豈敢造次輒有浪陳願導懇苦之言不違寃竟之說問慈悲萬善深知佛業祖教或毀或讚所以生疑上雖廣明猶

懷餘惑未審佛指究竟所歸更希旨南永祛
積滯答祖立言詮佛垂教跡但破偏計所執
不壞緣起法門徧計性者情有理無如繩上
生蛇杙中見鬼無而橫計脫體全空依他性
者即是因緣若隨淨緣即得成聖若隨染緣

即乃為凡是以從緣無性故號圓成法華經
云諸佛兩足尊知法常無性佛種從緣起是
故說一乘論云若見因緣法則名為見佛故
知無有一塵不合理事未有一法非是佛乘
皆是不了萬法之初源一塵之自性遂生情

執滯相迷名妄分自他強生離合致令理事
水火競生各據二邊不成一味自翳眼見明
珠有類以執心觀萬善生瑕媼怒癡性邪見
非道尚為解脫之門尊崇三寶利他眾信豈
成障閼之事是以達之則瓦礫為金取之則

史記

十四

妙藥成毒故經云虛妄是實語除邪執故實
語成虛妄生語見故但除去取之情盡履玄
通之道見網既裂惟一真心塵翳若除無非
佛國故大般若經云佛言我以諸法無所執
故即名般若波羅蜜多我等住此無所執故

便能獲得真金色身常光一尋若欲無過但
理事融通行願相從悲智兼濟

萬善同歸集卷第五

萬善同歸集卷第六

史六

故華嚴經云偏修理則滯寂偏修智則無悲
偏修悲則染習便增但發願則有為情起故
菩薩以法融通不去不取圭峯禪師云師資
傳授須識藥病承上方便皆須先開示本性

史六

方令依性修禪性不易悟多由執相故欲顯
性先須破執破執方便須凡聖俱泯功業齊
祛使心無所著方可修禪後學淺識便執此
言為究竟道又以修習之門人多放逸故後
廣說欣厭毀責貪瞋讚歎勤苦調身調息入

道次第後人聞此又迷本覺之用便一向執
相滯教違宗又學淺之人或祇知離垢清淨
離障解脫故毀禪門即心是佛或祇知自性
清淨性淨解脫故輕於教相持律坐禪調伏
等行不知必須頓悟自性清淨性淨解脫漸
脩令得圓滿清淨究竟解脫若身若心無所
擁滯又云空宗但迷遮詮非凡非聖一切不
可得等性宗有遮有表今時人皆謂遮言為
深表言為淺故惟重非心非佛良由以遮非
之辭為妙不欲親證自法體故如此也如上

所引祖教了然但以所非者破其執離性之相而生常見離相之性成其斷滅或有所讚者乃是了即相之性用不離體即性之相體不離用故知相是性之用性是相之體若欲讚性即是讚相若欲毀相祇是毀性云何妄起取捨之心而生異見若入一際法門則毀讚都息問如上問意祇據今時多取理通少從事習皆稱玄學離物超塵佛果尚鄙而不修片善豈宗而當作未審上古事摠如然請更決疑免墜邪網答前賢往聖志大心淳究

理而晷刻不忘潛行而神靈罔測時夕如臨深履薄尅證自然足救頭重實而不重虛貴行而不貴說涉有而不住有行空而不證空從小善而積殊功仗微因而成大果今時則劫濁時訛志微根屯我慢垢重懈怠障深一行無成百非恒習乘戒俱喪理事雙亡墮無知坑坐黑闇獄不達即事即理之旨空念破執破病之言智者深嗟愚人倣倣既成途轍頓奪尤難是以廣引祖佛之深心備彰經論之大意希悛舊執庶改前非同躡先聖之遺

之六

二

蹤共稟覺王之慈勅無虧本志免負四恩齊
登解脫之門咸闡離生之道成諸佛業滿大
菩提塞邪徑而闢正途堅信根而拔疑刺備
波羅蜜之智楫駕大般若之慈航越三有之
苦津入普賢之願海度法界之飄溺置涅槃

之大城往返塵勞周旋五趣不休不息無始
無終未來窮而不窮虛空盡而無盡仰惟佛
眼證此微誠普為群靈敬述慈集問上上根
人頓悟自心還假萬行助道熏脩不答圭峯
禪師有四句料簡一漸修頓悟如伐樹片片

漸斫一時頓倒二頓修漸悟如人學射頓者
箭箭直注意在的漸者久久方中三漸修漸
悟如登九層之臺足履漸高所見漸遠四頓
悟頓修如染一綫絲萬條頓色上四句多約
證悟惟頓悟漸修此約解悟如日頓出霜露

史六

三

漸消華嚴經說初發心時便成正覺然後登
地次第修證若未悟而修非真修也惟此頓
悟漸修既合佛乘不違圓旨如頓悟頓修亦
是多生漸修今生頓熟此在當人時中自驗
若所言如所行所行如所言量窮法界之邊

心合虛空之理八風不動三受寂然種現雙
消根隨俱盡若約自利則何假萬行勲修無
病不應服藥若約利他亦不可廢若不自作
爭勸他人故經云若自持戒勸他持戒若自
坐禪勸他坐禪智論云如百歲翁翁舞為教
授兒孫故先以欲鉤牽後令入佛智如或現
行未斷煩惱習氣又濃寓目生情觸塵成滯
雖了無生之義其力未充不可執云我已悟
了煩惱性空若起心修却為顛倒然則煩惱
性雖空能令受業業果無性亦作苦因苦痛

雖虛祗麼難忍如遭重病病亦全空何求醫
人偏服藥餌故知言行相違虛實可驗但量
根力不可自謾察念防非切宜仔細問老子
亦演行門仲尼大興善誘云何偏讚佛教而
稱獨美乎荅老子則絕聖棄智抱一守雌以
清虛澹泊為生務善嫉惡為教報應在一生
之內保守惟一身之命此並衆中之近唱非
象外之遐談義乖兼濟之道而無惠利也仲
尼則行忠立孝闡德垂仁惟敷世善未能忘
言神解故非大覺也是以仲尼荅季路曰生

與人事汝尚未知死與鬼神余焉能事此上
二教並未逾俗柱猶局塵籠豈能洞法界之
玄宗運無邊之妙行乎問佛行無上衆哲所
尊儒道二教既盡欽風云何後代之中而有
毀謗不信者何荅儒道仙宗皆是菩薩示助

史六

四

揚化同讚佛乘老子云吾師號佛覺一切民
也西昇經云吾師化遊天竺善入泥洹符子
云老氏之師名釋迦文列子云商太宰誥問
孔丘曰夫子聖人歟孔子對曰丘博識強記
非聖人也又問三王聖人歟對曰三王善用

智勇非聖人也又問五帝聖人歟對曰五帝
善用仁義亦非丘所知又問三皇聖人歟對
曰三皇善任因時亦非丘所知太宰誥大駭
曰然則孰為聖人夫子動容有言曰丘聞西
方聖者焉不治而不乱不言而自信不化而

自行蕩蕩乎民無能名焉吳書云吳主孫權
問尚書令闕澤曰孔丘老子得與佛比對以
不闕澤曰若招孔老二家比較遠方佛法遠
則遠矣所以言者孔老設教法天制用不敢
違天諸佛設教諸天奉行不敢違佛以此言

之實非比對明矣吳主大悅用闕澤為太子
大傳起世界經云佛言我遣二聖者往震旦
行化一者老子是迦葉菩薩二者孔子是儒
童菩薩明知自古及今但有益於人間者
皆是密化菩薩惟大士之所明非常情之所

史六

五

測遂使寡聞淺識起謗如煙並是不了本宗
妄生愚執事老君者則飛符走印煉石燒金
施醮祭之鯨羶習神仙之誑誕入孔門者志
乖淳朴意尚浮華騁鸚鵡之狂才擅蜘蛛之
小巧此皆違背先德自失本宗斯人不謗焉

顯其深下士不笑寧成其道是以佛法如海
無所不包至理猶空何門不入衆哲冥會千
聖交歸真俗齊行愚智一照開俗諦也則勸
臣以忠勸子以孝勸國以紹勸家以和私善
示天堂之樂懲非顯地獄之苦不惟一字以
為褒豈止五刑而作戒敷真諦也則是非雙
泯能所俱空收萬像為一真會三乘歸圓極
非二諦之所齊豈百家之所及問道無不在
真性未移有佛無佛性相常住此即一體三
寶常現世間何用金檀刻像竹帛書經剃髮

出塵以為三寶。答上根玄解。何假相施中下。鈍機須憑事發。不現正相。但染邪風。祇如此。士像教未來。惟興外道。固知真偽莫辨。靈蹤伏自漢明夢現金身。吳帝瑞彰舍利。爾後國王長者。方知歸敬之門。哲士明人。頓曉棲神。

之地。是知迹能顯本。相可通真。因筌得魚。理事無廢。是以木母變色。金像舒光。道藉人弘。物由情感。能生淨種。敬假像而開心。不結信緣。遇真儀而不見。是以迷之則本末咸喪。了之則真假俱通。若驗斯文。奚生取捨。或廣興

供養發大志誠。意業功深。修因力大。是以貧女獻潘澱。而位登支佛。童子進土麴。而福受輪王。問因緣義。空自他無性。涅槃生死一體。無殊如何。行慈廣垂攝化。答雖人法本空。彼我虛寂。而衆生迷如夢。所得都不覺知。菩薩

史六

六

興悲而示真實。大般若經云。佛告善現。應知有情。雖自性空。遠離衆相。而有雜染。清淨可得。起信論云。雖念諸法。自性不生。而復不生。因緣和合。善惡之業。苦樂等報。不失不壞。雖念因緣。善惡業報。而亦即念性不可得。是以

觀緣起而不住涅槃了性空而不住生死間
西天九十六種外道各立修行之門勤苦兢
兢非無善業云何報盡還入輪迴不得解脫
答未達無生正理惟修生滅有因起貪著之
心懷希望之意以苦捨苦從迷積迷匍匐昇

沉輪迴莫已蒸砂之喻足可明之問非惟外
道修善不得解脫依內教修亦有不得道者
何耶答皆為有我故不得斷結凡作之時皆
云我能作隨境所得住著因果若了二無我
理證解一心不動塵勞當處解脫問正作之

時云何了無我答所作之時從緣而起以有
施為而無主宰所出音聲猶如風鐸隨機轉
動惟似木人但依業力所為而無我性可得
四大聚散生滅隨緣乃至六趣受身亦復如
是實無有人而能來往華嚴經云如機關木

史六

七

人能出種種聲彼無我非我業性亦如是論
云因緣故生天因緣故墮地獄若言是我非
因緣者作惡何不生天乃墮地獄耶我豈愛
彼地獄受苦耶我既作惡而不受樂者故知
善惡感報惟是因緣非是我也而眾生於無

我無作之中妄認我作強為其主不知是識
所為決定無有作者外道皆稱執作悉有神
我若無神我誰為所作智論破云心是識相
故自能使身不待神也如火性能燒物不假
人唯識論云諸所執實有我體為有思慮為

無思慮有思慮應是無常非一切時有思慮
故無思慮如虛空不能作業亦不受果故所
執我理俱不成由此故知定無實我但有諸
識無始時來前滅後生因果相續由妄熏習
似我相現愚者於中妄執為我又無我者即

是無住性即是體體是主質義凡有一法皆
從衆緣所成實無本體以無體故空是以衆
生於性空中執為實有內則為我所羈外則
為塵所局所以修行不出心境及至得果不
離所因昇降雖殊常繫諸有互為高下終始

輪迴衆患所生我為其本問既萬法無體本
來自空云何復有諸法建立答祇為空無體
性而從緣生若有自體即不假緣生既不從
緣生即萬法有其定體若立定相即成常過
善惡不可改移因果遂成錯亂為惡應生天

為善應沉淵以無因故作善應無福作惡應
無罪以無果故是以萬法無體無定但從緣
現以緣生故無性諸法皆空以無性故緣生
諸法建立故華嚴經明菩薩於無自性建立
立一切佛事是以因空立有有無自名從有

史六

辨空空無自體問現見諸法發生云何無性
答即生無生所以無性若云有生為復自生
為他生為共生為無因生若云自生譬如自
身若非父母云何得生故云此身即父母之
遺體以過去業為內因託父母體為外緣內

外因緣和合而有即非自生或云他生者若
無宿業自因終不託胎皆從自業而有譬如
外具水土若無種子決定不生若共生者因
假緣成何有自體之用緣從因起而無外助
之能因緣各無和合豈有如一砂無油和衆
砂而非有一盲不見聚群盲而豈觀若無因
生者即石女生兒龜毛作拂有因尚無無因
豈有又從有因而立無因有因既無無因亦
絕但了自他兩句無生則四句皆破既無自
他將誰作和合及以無因有四句自然宴寂

是知無生之生幻相宛爾生之無生真性湛然故金剛三昧經云因緣所生義是義滅非生滅諸生滅義是義生非滅問既一切諸法無性無生云何衆生執著境緣而受實報答祇為不了無性迷為實有所以受其實報如

史六

九

達其性空即不生貪著既不耽著任運施為不住其因終不受果故經云心生種種法生又云一切惟心造若心不起外境常虛了境性空其心自寂妄心既寂幻相何生心境俱冥自然合道華嚴經云眼耳鼻舌身心意諸

情根一切空無性妄心分別有又云世間一切法但以心為主隨解取衆相顛倒不如實問既受實報云何言一切空答分明云衆生自妄認為實其性常空雖受苦樂厭愛情生人法俱空一無所得猶如夢見好惡欣感盈

懷及至覺來豁然無事覺來非有夢裏非無既習顛倒之因不無虛妄之果問妄心幻境為復本無從今日無咎心境本無問既是本無衆生云何不得解脫答本來無縛云何稱解祇為不達本無妄生今有從無始際熏習

之力不覺不知隨業而轉雖在業拘性常清淨問如何得究竟清淨答此有二義一者了其本無得自性清淨二者淨其妄染得離垢清淨本性既淨妄念不生二障雙消三輪廓徹契本明源種現俱寂問佛道遐昌凡聖同稟何乃興替不定而有隳壞者乎答夫萬物有遷三寶常住寂然不動感通而化非初誕於王宮不長逝於雙樹若衆生福薄則佛事冰消若國土緣深則梵刹雲聳在人自生得喪非法而有盛衰故法華經云衆生見劫盡

大火所燒時我此土安隱天人常充滿問既讚衆善報應非虛云何有勤苦求者全無尅證答修善之人自有明顯二益法華玄義四句料簡一宜機冥應若過去善修三業現在未運心口藉往善力此名為冥機雖不見靈

史六

十

應而密為法身所益不見不聞非覺非知是名冥益應身應是顯應法身應是冥應二冥機顯益過去植善而冥機已成便得值佛聞法現前獲利是為顯益如初佛出世最初得度之人現在何曾修行諸佛照其宿機自往

度之三顯機顯益現在身口精勤不懈而能感降道場禮懺能感靈瑞四顯機宜益如人雖一世勤苦現善濃積而不顯感實有其利若解四意一切低頭舉手福不虛棄終日無感終日無悔矣問或有一生修善現繁惡報

終日造惡目覩吉昌者何答業通三世生熟不定又通三報厚薄相傾西天第十九祖師鳩摩羅多云前生修功德而致強半功有少破壞故迴心修惡行罪業少功德亦死先受福正受快活時心侶得安樂忽降諸衰惱其

家漸殘破承彼先惡業相續致於此非是今修福而招斯惡報又曰前世作惡業其罪強半功忽遇一智者而教修福德福德雖修已其善未過彼功德少於罪亦死生貧窮心不敬信佛亦不重三寶如是過半已其家漸富

史六

十一

有資生多財帛承彼先善業相續致於此非是今作惡而招斯善報論云今我疾苦皆由過去今生修福報在當來若見喜殺長壽好施貧窮能信斯言不生邪見若不解此憂悔失理為徒功喪計善惡無徵但修善之時一

心不退既不間斷福果長新祇慮中途自生遮障識達賢士曉斯旨焉問惡能掩善則禍起而福傾善能排惡則障消而道現何乃或有從生積善反受其殃及蕭梁武帝歸憑三寶一朝困斃全無靈祐者何舉世咸疑請消餘滯答前明業通三世事已昭然今重決疑有其三義一者是諸佛菩薩示現施為隨順世間同其苦樂千變萬化誘引勞生或居安而忽危示物極即反或處榮而頓弊現盛必有衰令耽榮者悟世無常使恃祿者知生有

限潛消貪垢巧洗情塵示正示邪或逆或順斯乃密化之秘術非凡小之所知二者善惡無定果報從緣業力難思勢不可遏故涅槃經云業有三報一現報現作善惡現受苦樂二生報今生作業來生受果三後報或今生作業過百千生方受其報又經云有業現苦有苦報有業現苦有樂報有樂現樂有樂報有業現有樂有苦報或餘福未盡惡不即加或宿殃尚在善緣便發又若善多惡少則先受樂而後受苦則福盡禍生或善少惡多則

先受苦而後受樂則灾消慶集此皆並是後報善惡業熟今生善力難排斷結證聖尚還宿債如師子比丘一行禪師等豈况業繫凡夫寧逃此患三者或善根深厚修進堅牢決志無疑誓過金石則現受輕報能斷深慙故

史六

十二

經云今生作惡少為善多則迴地獄重而現世輕或作善少為惡多則迴現世輕而地獄重乃至純善修行之人現世暫時頭痛則滅百千萬劫地獄之苦是以菩薩發願云願得今生償不入惡道受苦作惡之人雖現安樂

果在阿鼻積劫燒然受苦無間又復修行力至將出輪迴臨終之時雖受微苦無始惡業一時還盡如唐三藏法師九世支那為僧福德智慧常稱第一大弘聖教廣演佛乘利濟無邊殊功罕測及至遷化之時卧疾房中瞻

病僧明藏禪師見有二人各長一丈共捧一白蓮華至法師前云師從無始已來所有損惱有情諸有惡業因今小疾並得消殞應生欣慶法師顧視合掌遂右脇而卧弟子問云和尚決定得生彌勒內院不報云得生言訖

氣息漸微奄然神逝若明如上三義方為知
因識果之人或昧斯文終生疑謗問夫修善
應純云何造惡既能造惡何用善乎若善惡
齊行恐虛功力若若出家菩薩無諸障礙應
純修善直至菩提如在家菩薩事業所拘未

卷六

十三

得純淨傍興善道以為對治夫業難頓移惡
非全斷漸積功德以趣菩提若更積惡不修
惡無有盡須行善業以奪惡因譬喻經云昔
有國王出射獵還過寺繞塔為沙門作禮群
臣共笑之王乃覺知問群臣曰有金在釜釜

中湯沸以手取金可得不答曰不可得王言
以冷水投中可取得不臣白王言可得也王
言我行王事射獵所作如湯沸燒香爇燈繞
塔如持冷水投沸湯中夫王作有善惡之行
何故但有惡無善乎問在家菩薩亦許純修

善不答若志苦心堅一向歸命如鹿在網若
火燒頭惟求出離之門不顧人間之事自古
及今亦多此等譬喻經云昔有國王大好道
德常行繞塔百匝未竟遶國王來征伐欲奪
其國傍臣大恐怖即白王言置斯旋塔以禳

重寇王言聽使兵來我終不止心意如故繞塔未竟兵散罷去夫人有一心定意無所不消也是以河岳不靈惟人所感但能志到無往不從至於冰池躍鱗寒林抽笋故非神力之所為也問若廣修萬善皆奉慈門但稟真詮有妨世諦則處國廢其治國在家闕於成家雖稱利人未得全美若佛法衆善普潤無邊力濟存亡道含真俗於國有善則國霸於家有善則家肥所利弘多為益不少所以書云積善之家必有余慶積惡之家必有余殃

又云行善降之百祥為惡降之百殃宋典文帝以元嘉中間何侍中曰范泰謝靈運云六經本是濟俗若性靈真要則以佛經為指南如其率土之濱皆純此化則吾坐致太平也侍中對曰夫百家之鄉十人持五戒則十人淳謹千室之邑百人修十善則百人和厚傳史云此風訓已遍宇內編戶千萬則仁人百萬夫能行一善則去一惡去一惡則息一刑一刑息於家萬刑息於國陛下所謂坐致太平也是以包羅法界徧滿虛空一善所行無往不

利則是立身輔化匡國保家之要軌矣若以此立身無身不立以此匡國無國不匡近福人天遠階佛果問所修萬善以何為根本乎吞一切理事以心為本約理者經云觀一切法即心自性成就慧身不由他悟此以真如

觀真實心為本約事者經云心如工畫師能畫諸世間五蘊悉從生無法而不造此以心識觀緣慮心為本真實心為體緣慮心為用用即心生滅門體即心真如門約體用分二惟是一心即體之用用不離體即用之體體

不離用開合雖殊真性不動心能作佛心作衆生心作天堂心作地獄心異則千差競起心平則法界坦然心凡則三毒縈纏心聖則六通自在心空則一道清淨心有則萬境縱橫如谷應聲語高而響大似鏡鑑像形曲而

央六

十五

影邪以萬行由心一切在我內虛外終不實內細外終不麤善因終值善緣惡行難逃惡境蹈雲霞而飲甘露非他所披卧煙燄而取膿血皆自所為非天之所生非地之所出祇在最初一念致此昇沉欲外安和但內寧靜

心虛境寂念起法生水濁波昏潭清月朗修行之要靡出於斯可謂衆妙之門群靈之府昇降之本禍福之源但正自心何疑別境經云為善福隨履惡禍追響之應聲善惡如音非天龍鬼神所授非先彌後裔所為造之者

惟心成者身口矣佛說偈曰心為法本心尊心使中者念惡即言即行罪苦自追車轍于轍心為法本心尊心使中心念善即言即行福樂自追如影隨形華嚴經云智首菩薩問文殊師利云何得無過失身口意業乃至為

上為無上為等為無等等文殊師利荅言佛子若諸菩薩善用其心則獲一切勝妙功德密嚴經云如地無分別庶物依以生藏識亦如是衆境之依處如人以已手還自摩捏身亦如象以鼻取水自沾沐復以諸嬰兒以口

含其指如是自心內現境還自緣是心之境界普徧於三有久修觀行者而能善通達內外諸世間一切惟心現以此之言豈止萬善之本乃至有情無情凡聖境界虛空萬像悉為其本亦云無住為本本利道生斯之謂矣

問萬行之源以心為本助道門內何法為先
答以其真實正直為先慈悲攝化為道以正
直故果無迂曲行順真如以慈悲故不墮小
乘功齊大覺以此二門自他兼利問前明先
知正宗徧行助道今萬行門中以消疑滯未

卷六

十六

審以何為宗旨答佛法本無定止但隨入處
明見心性權名為宗問以何方便而得悟入
答有方便門應須自入問豈無指示答見性
無方云何所指實非見聞覺知境界問既無
所指明見之時見何物答見無物問無物如

何見答無物即無見無見是真見有見即隨
塵問若然如是教中佛云何亦說見答佛隨
世法即是不見見非同凡夫執為實見究竟
而論見性非屬有無湛然常寂問畢竟如何
答須親省察問前云心外無法云何稱有見
即隨塵答一切色境皆是第八識親相分現
量所得實無外法眼見色時未生分別剎那
轉入明了意識分別形像作外量解遂執成
塵境問此境何識所現答塵以識所現內識
變起似塵而現如鏡中見自面像非他影現

唯識論云內識轉似外境我法分別熏習力故諸識生時變自我法此我法相雖在內識而由分別似外境現諸有情類無始時來緣此執為實我實法如幻夢者幻夢力故心但種種外境相現內識所變但我似法雖有而

卷六

十七

非實經云由自心執著心似外境轉彼所見非有是故說惟心此由約事而論說為識變若深達真如一切諸法本來不動即心自性亦非待變問此塵與識從何而立答謂由名言熏習種子而得建立實無其體而似有義

相貌顯現如幻物等因名立法因法建名名中無法法中無名無體互成有相俱寂問此識既不立何識為宗答諸識亦無畢竟所歸約極權論惟一真性此亂識為遣境故立境消識謝能所俱亡惟一真識即是實性三無

性論云先以亂識遣於外境次阿摩羅識遣於亂識究竟惟一淨識問理事無閼萬事圓修何教所宗何諦所攝答法性融通隨緣自在隨舉一法萬行圓收即華嚴所宗圓教所攝若六度萬行成佛度生雖淨緣起皆是諦

所收若發明本宗深窮果海則理智俱亡言
心路絕問此集所陳有何名目答若問假名
數乃恒沙今畧而言之搃名萬善同歸別開
十義一名理事無闕二名權實雙行三名二
諦並陳四名性相融即五名體用自在六名

空有相成七名正助兼修八名同異一際九
名修性不二十名因果無差問名因義立義
假名詮既立假名其義何述答第一理事無
闕者理則無為事則有為終日為而未嘗有
為終日不為而未嘗無為為與無為非一非

異同法性源等虛空界若云是一仁王經說
諸菩薩有為功德無為功德皆悉成就若但
是一不應說有二種功德若云是異般若經
云不得離有為說無為不得離無為說有為
是以理事相即非斷非常起滅同時無闕雙

史六

六

現第二權實雙行者實則真際權則化門從
真際而起化實外無權因事跡而得本權外
無實常冥一旨無闕雙行遮照同時理量齊
現第三二諦並陳者諸佛常依二諦說法何
以故俗是真詮了俗無性即是真諦故云若

不得俗諦不得第一義所以真不待立而常現俗不待違而自空二諦雙存如同波水水窮波末波水同時波徹水源動濕一際第四性相融即者無量義經云無量義者從一法生所言法者即是真心從一真心具不變隨緣二義不變是性隨緣是相性相之體相是性之用以不了根源則妄生諍論如今毀相者是不識心之用毀性者是不識心之體若能融通取捨俱息第五體用自在者體即法性之理用乃智應之事舉體全用用即非

一舉用全體體即非異即體之用不闕用即用之體不失體所以一味雙分自在無闕第六空有相成者且夫一切萬法本無定相互成互壞相攝相資空因有立緣生故性空有假空成無性故緣起因義顯別隨見成差迷

中六

九

之則萬狀不同悟之則三乘不異何者且如有之一法小乘見是實色初教觀為幻有終教則色空無闕以空不守自性隨緣成諸有故頓教見一切色法無非真性圓教見是無盡法界若如是融通即成真空妙有有能顯

萬德空能成一切第七正助兼修者正即是主助即是伴因伴成主無助即正終不圓從主得伴無正則助無由立是以主伴相成正助兼備亦是止觀雙運隱顯互興內外更資乘戒兼急第八同異一際者同則據理不變

異則約事隨緣所以不變故乃能隨緣隨緣故所以不變祇為不異而成異事不同而立同門若異則壞於異以失體故若同則不成同以無用故所以同無同而異異無異而同各執即落斷常雙融即成佛法故經云奇哉

世尊於無異法中而說諸法異第九修性不二者本有曰性非從觀成今顯曰修因智而現由修顯本有之性因性發今日之修全性成修全修成性修性無二因緣似分第十因果無差者因從果起果滿則乃成因果逐因

生因圓則能立果事分前後理即同時相助相酬業用無失問此集所申當何等機但何等利答自他兼利頻漸俱收自利者助道之圓門脩行之玄鏡利他者滯真之皎日二見之良醫頻行者不違性起之門能成法界之

行漸進者免廢方便之教終歸究竟之乘若
信之者則稟佛言若毀之者則謗佛意信毀
交報因果歷然略述教海之一塵普施法界
之含識願弘正道用報佛恩頌曰

菩提無發而發 佛道無求而求 妙用無行而行

史六

二十

真智無作而作 興悲悟而同體 行慈深入無緣
無所捨而行檀 無所持而具戒 脩進了無所起
習忍達無所傷 般若悟境無生 禪定知心無住
鑒無身而具相 證無說而談詮 建立水月道場
莊嚴性空世界 羅列幻化供具 供養影響如來

懺悔罪性本空 勸請法身常住 迴向了無所得
隨喜福等真如 讚歎彼我虛玄 發願能所平等
禮拜影現法會 行道足躡真空 焚香妙達無生
誦經深通實相 散華顯諸無著 彈指以表去塵
施為令響度門 修習空華萬行 深入緣生性海
常遊如幻法門 誓斷無染塵勞 願生惟心淨土
履踐實際理地 出入無得觀門 降伏鏡像魔軍
大作夢中佛事 廣度如化含識 同證寂滅菩提
萬善同歸集卷第六